

PROGRAMA OBSERVASAUN PARLAMENTU RELATÓRIU ANUÁL 2020



PARLAMENTO NACIONAL

República Democrática de Timor-Leste



Gabinete Apoiu Sosiedade Sivil,
Gabinete Primeiru Ministru

Servisu hodi:

■ Promove funzionamentu Parlamentu Nasionál ne'ebé transparente, akontavel no efetivu iha halo lei, fiskalizasaun no foti desizaun políтика;

■ Promove partisipasaun pública iha prosesu halo lei;

■ Asesu ba justisa formál;

■ Habelar informasaun liuhosi formasaun iha komunidade



Governance for Development (GfD) /
CARDNO, Embaixada Austrália iha Timor-Leste

Boa Governasaun



Asesu ba Justisa

Órgaan soberanu Síra

Advokasia



Edukasaun & Treinamento

Misaun

Servisu ho espíritu kolaborativu hodi promove demokrasia, lei, justisa no direitu umanu liuhosi:
Monitorizasaun, Edukasaun no Advokasia

Rua Beco Lakateu, Aldeia Manu fuik, Suku Colmera, Administrativu Vera Cruz
Dili, Timor-Leste, PoBox: 275
Telefone: 3323883 | 77295795

www.jsmp.tl

Facebook: www.facebook.com/timorleste.jsmp

Twitter: @JSMPtl

Tabela Konteúdu

SUMÁRIU EZEKUTIVU	4
I. INTRODUSAUN	12
II. PARLAMENTU NASIONÁL.....	14
2.1. PLENÁRIA NO REUNIAUN PLENÁRIA	14
<i>Gráfiku 1 Reuniaun plenaria entre 2018 no 2020.....</i>	15
2.2. PONTUALIDADE.....	16
2.3. PREZENSA.....	16
<i>Gráfiku 2: Prezença Deputadu sira-nian iha reuniaun plenaria iha entre 2018 no 2020.....</i>	17
2.4. DIREITU BA UZU PALAVRA.....	17
2.5. INTERESE PARTIDÁRIU VERSU INTERESE NASIONÁL.....	18
2.6. FISKALIZASAUN	20
2.7. PRODUTIVIDADE	22
<i>Gráfiku 3 Produtividade Parlamentu iha halo lei, fiskalizasaun no foti desizaun política.....</i>	22
III. PROSESU LEJIZLATIVU	23
3.1. DISKUSAUN NO APROVASAUN BA LEI SIRA	23
<i>Gráfiku 4 Variasaun número lei no rezolusaun entre 2018-2020.....</i>	24
3.2. DISKUSAUN NO APROVASAUN BA REZOLUSAUN SIRA.....	25
IV. KOMISAUN ESPESIALIZADA PERMANENTE (KEP) SIRA	27
4.1. ATIVIDADE FISKALIZASAUN	28
4.2. KOMISAUN A NO PRODUTU LEJIZLATIVU.....	28
4.3. SERBISU HAMUTUK ENTRE KOMISAUN A HO JSMP	30
V. OBSERVASAUN POLÍTIKA NO ANALIZA LEJIZLATIVU	31
5.1. MEKANIZMU HODI GARANTE KONSTITUISAUN NO <i>IMPEACHMENT</i> BA PREZIDENTE REPÚBLICA	31
5.2. ESTADU EMERJÉNSIA NO NIA IMPAKTU SOSIO-EKONÓMIKU NO DIREITU UMANU	32
5.3. DESTITUISAUN ESTRUTURA MEZA PARLAMENTU PARLAMENTU	33
5.4. LEI NÚ. 10/2020 KONA-BA ORSAMENTU JERÁL ESTADU (OJE) 2020	34
5.5. LEI NÚ. 14/2020 KONA-BA ORSAMENTU JERÁL 2021.....	37
5.5.1. <i>Estrutura orsamentu.....</i>	37
5.5.2. <i>Política jéneru.....</i>	37
5.5.3. <i>Área prioriedade.....</i>	38
5.5.4. <i>Verba orsamentál la nesesária</i>	38
5.5.5. <i>Kumprimentu ba prosedimentu OJE</i>	38
5.5.6. <i>Fiskalizasaun Ezekusaun OJE</i>	39
5.6. LEI NÚ. 7/2020 KONA-BA MEDIDA SIRA BA PREVESAUN NO KOMBATE KORRUPSAUN	39
5.7. ALTERASAUN BA ARTIGU 1475 KÓDIGU SIVÍL TIMOR-LESTE KONA-BA KAZAMENTU	40
VI. ADVOKASIA.....	43
6.1. PARASER.....	43
6.2. SUMÁRIU MENSÁL.....	43
6.3. AUDÉNSIA PÚBLIKU.....	44


6.4. KOMUNIKADU IMPRENSA	45
VII. HASA'E KOÑESIMENTU MEMBRU KONSELLU SUKU IHA ÁREA REMOTA	48
7.1. PREOKUPASAUN KOMUNIDADE NIAN	48
<i>Gráfiku 5 Rezultadu pré no pós teste</i>	50
VIII. KONKLUZAUN NO REKOMENDASAUN.....	52
ANEKSU.....	55
TABELA 1 LEI PROMULGADU NO PUBLIKADU IHA JORNÁL REPÚBLIKA.....	55
TABELA 2 REZOLUSAUN SIRA NE'EBÉ APROVADU NO PUBLIKA ONA IHA JORNÁL REPÚBLIKA	56

Sumáriu Ezekutivu

Parlamentu Nasionál (PN) nu'udar órgaun soberanu Estadu nian ne'ebé reprezenta povu tomak ho podér atu halo lei, fiskalizasaun no foti desizaun política hanesan prevee iha Artigu 92 Konstituisaun RDTL. Alende Konstituisaun, iha mós enkuadramentu legál lubuk ida ne'ebé mak regula kona-ba PN nia estrutura, organizasaun, funzionamentu, administrasaun, jestaun no prosesu inkéritu. Lei sira ne'e mak hanesan Lei Nú. 4/2002 kona-ba Órganika Parlamentu Nasionál ne'ebé revoga ho Lei Nú. 15/2008 ne'ebé revoga fali ho Lei Nú. 12/2017 kona-ba Lei Organizasaun no Funzionamentu Administrassaun Parlamentár, Lei Nú. 4/2009 kona-ba Rejime Jurídiku ba Inkéritu Parlamentár, Lei Nú. 15/2009 ne'ebé altera ho Lei Nú. 1/2016 kona-ba Rejimentu Parlamentu no Lei Nú. 10/2016 ne'ebé Aprova Estatutu Funzionáriu Parlamentu Nasionál.


Parlamentu Nasionál hala'o nia knaar no funsiona liuhusi reuniaun plenaria no mós reuniaun Komisaun Espesializada Permanente sira nian. Reuniaun plenaria no Komisaun sira-nian regula iha provizaun Artigu 46 Rejimentu Parlamentu Nasionál. Oráriu reuniaun plenaria no Komisaun sira-nian tuir provizaun pontu 2) Artigu 46 Rejimentu Parlamentu nian mak iha periódu dader hahú hosi tuku 09:00 to'o 12:30 no periódu loraik nian hahú hosi 15:00 to'o 18:00.

JSMP iha 2020 konsege monitorizaun reuniaun plenaria dala 72 no reuniaun Komisaun A dala 40. Produtividade PN sa'e maka'as iha 2020 bainhira kompara ho tinan 2018 no 2019 mezmuke kestaun pontualidade nafatin sai kestaun.



Alende produtividade, prezensa deputadu sira nian mós iha mudansa pozitivu. Númeru falta injustifikadu tun no laiha ona falta injustifikadu tutuir malu liuhusi loron lima hanesan tinan sira antes.

Númeru Prezensa Totál (PT), Falta Injustifikadu (FI), Falta Justifikadu (FJ) no FI tutuir malu loron 5 ba leten




Iha termu produtividate iha parte halo lei nian, Parlamentu Nasional iha 2020 konsege prodús lei 15 no rezolusaun 10, inklui fiskalizasaun Komisaun Espesializada Permanente sira-nian hamutuk 35. Númeru maioria husi lei ne'e kona-ba deklarasaun Estadu Emerjénsia.



Lei importante ida ne'ebé Parlamentu Nasional liuhusi esforsu Komisaun A nian konsege finaliza no aprova iha 2020 nian mak Lei kona-ba Medida sira Prevensaun no Kombate Korrupsaun. Alende ne'e, PN mós konsege aprova Lei Protesaun Sivil, nune'e mós Lei Orsamentu Jerál Estadu (OJE) 2020 no 2021.

Iha termu halo lei, númeru lei ne'ebé Parlamentu halo iha 2020 barak liu kompara ho 2018 no 2019.



Alende asuntu sira relevante ba PN, JSMP mós iha 2020, halo observasaun krítika no analiza ba situasaun política no asuntu lejizlativu iha períodu 2020 nian. Asuntu ka kestaun sira ne'ebé JSMP halo observasaun mak relasiona ho kestaun kona-ba mekanizmu ba garante Konstituisaun no *impeachment* ba Prezidente Repúblika, pandemia Covid-19 no implementasaun Estadu Emerjénsia (EE), destituisaun ba estrutura Meza Parlamentu, Lei Nú. 10/2020 kona-ba Orsamentu Jerál Estadu (OJE) 2020, Lei Nú. 14/2020 kona-ba Orsamentu Jerál 2021, Lei Nú. 7/2020 kona-ba Medida sira ba Prevensaun no Kombate Korrupsaun no Alterasaun ba Artigu 1475 Kódigu Sivil Timor-Leste kona-ba Kazamentu.

Kestaun kona-ba mekanizmu ba garante Konstituisaun no *impeachment* ba Prezidente Repúblika, JSMP halo peskiza hodi buka referénsia teórica no prática, nune'e mós legál husi Portugal no Brasil. Alende halo mós interpretasaun ba provizaun sira husi Konstituisaun RDTL (K-RDTL) relativamente ba provizaun Artigu 149 to'o 153 kona-ba garantia Konstituisaun no provizaun Artigu 79 kona-ba responsabilidade kriminál no obrigasaun konstitusionál Prezidente Repúblika nian. JSMP mós koloka exemplu konkretu balun ne'ebé titulár sira husi órgaun soberanu sira halo hodi husu fiskalizasaun ba konstitusionalidade hanesan petisaun Bankada CNRT no eis Prezidente Parlamentu Nasional, distintu deputadu Arão Noe Amaral. Detallu husi peskiza no analiza ne'e JSMP prodús iha relatóriu temátku ida ho nia rekomentasaun sira dirije ba órgaun no instituisaun relevante sira, inklui públiku iha jerál¹.

Observasaun JSMP nian ba pandemia Covid-19 no deklarasaun EE ne'ebé halo iha 2020 ho intensaun atu haree kona-ba impaktu husi deklarasaun EE ba situasaun sósio-ekonómiku no política ka direitu umanu sidauna sira nian. Rezultadu observasaun JSMP nian hatudu katak durante deklarasaun EE iha faze dahuluk no daruak, iha impaktu boot ba situasaun sosio-

¹ Rezultadu peskiza, analiza no interpretasaun ne'e, JSMP prodús iha relatóriu ketak ida ne'ebé lansa hamutuk ho relatóriu ida ne'e "Mekanizmu ba Garante Konstituisaun no Impeachment ba Prezidente Repúblika": <https://jsmp.tl/wp-content/uploads/Relatorio-tematika-mekanizmu-garante-Konstituisaun-no-Impeachment-ba-PR.pdf>

ekonomika sidadaun sira-nian no iha mós violasaun direitu umanu balun husi parte autoridade sira-nian. Nune'e, JSMP hanoin, importante ba Governu atu bele kria mekanizmu ida ne'ebé di'ak atu bele responde ba pandemia Covid-19 ho efetivu no iha tempu hanesan asegura mós direitu fundamental sira sidadaun sira-nian.

Kestaun destituisaun ba estrutura Meza Parlamentu Nasional, tuir JSMP nia observasaun, tuir lolos, sei la mosu tan disturbui iha Parlamentu Nasional iha 18 no 19 Maiu 2020 bainhira halo diskusaun no votasaun ba destituisaun ba Presidente Parlamentu no estrutura Meza Parlamentu. Ida ne'e tanba mekanizmu no prosesu destituisaun regula ho klaru no detallu iha provizaun Artigu 16 B no 20 B Rejimentu Parlamentu Nasional. Rekizitu atu hato'o pedidu destituisaun ba Presidente Parlamentu rekere deputadu na'in sanulu no ba membru Meza Parlamentu rekere deputadu na'in ualu. Nia prosesu votasaun tenke sekretu no tenke aprova ho maioria absoluta husi deputadu sira ne'ebé efetivu iha funsaun.

Tuir JSMP nia observasaun, iha razaun fundamental rua ne'ebé lori ba destituisaun ba Presidente Parlamentu no membru Meza Parlamentu. Razaun sira ne'e mak, dahuluk bankada CNRT sai ona husi Governu koligasaun lideradu husi Primeiru Ministru Taur Matan Ruak no partidu Fretelin mak viabiliza governasaun ne'e no daruak, Presidente Parlamentu iha altura distintu deputadu Arão Noe Amaral la prezide reuniaun plenaria mezmuke marka prezensa iha Parlamentu. Tuir regra, prezidénsia no estrutura Meza Parlamentu tenke prezide no kompostu husi deputadu sira partidu ka koligasaun partidu sira kaer ukun nian. Nune'e, presiza duni halo destituisaun ba Presidente Parlamentu no estrutura Meza Parlamentu Nasional.

JSMP mós halo observasaun ba Lei Orsamentu Jerál Estadu (OJE) 2020 nian tanba orsamentu ida sumba ka monu tiha ka la hetan apoiu husi deputadu sira partidu koligasaun nian, partikularmente partidu CNRT. Nune'e, Governu Konstitusionál VIII sustenta makina estadu ho orsamentu duodesimál durante fulan sanulu nia laran. Iha 15 Outubru 2020, Governu apresenta fila fali ba iha Parlamentu Nasional no hetan aprovasaun ho Lei Nú. 10 /2020 de 19 de Outubru Orsamentu Jerál Estadu ba 2020.² Votasaun ba lei ne'e hala'o iha loron 8 fulan-outubru tinan 2020, pasa ho votu afavór 43, kontra 21 no abstensaun 1.

Observasaun JSMP nian ba OJE 2021 nian haree ba modelu ka estrutura orsamentu ne'ebé sei bazeia ba programa la'ós bazeia ba dotasaun hanesan orsamentu sira antes. Alende ne'e, OJE 2021 nian tau mós prioridade aas ba asuntu feto, nune'e, iha diresaun no Ministériu balun ne'ebé aloka orsamentu ba programa sira ne'ebé tata asuntu feto nian.

JSMP nia observasaun no analiza ba Lei kona-ba Medida sira Prevensaun no Kombate Korrupsaun hatudu katak lei ne'e nu'udar medida ida ne'ebé estremamente importante ba prevene no kombate korrupsaun iha Timor-Leste. Lei ne'e hatuur kona-ba medida jerál sira ba prevensaun, rejime deklarasaun rendimento, bein no interesse, define krime korrupsaun, pena aplikável no meiu espesiál atu hetan no rai prova sira.

Parlamentu Nasional iha 20 Jullu 2020, liuhusi reuniaun plenária halo diskusaun no aprovasaun iha final globál ho unanimidade ba Projetu Lei Nú.1/V (1^a) kona-ba Medida Prevensaun no

² Bele asesu Lei OJO iha website jornal da república:
http://www.mj.gov.tl/jornal/public/docs/2020/serie_1/SERIE_1_NO_42_A.pdf

Kombate Korrupsaun ho votu afavór 61, kontra 0 no abstensaun 0 hodi sai Lei Nú. 7/2020. Lei ne'e altera Kódigu Penál, Lei Brankeamentu Kapítál, Prátika ba Arte Marsiál, Rituál, Arma-Brankas no Rama Ambom inklui alterasaun dahuluk ba Lei kona-ba Komisaun Anti-Korrupsaun. JSMP iha 2020 nafatin kontinua hala'o nia advokasia regularmente liuhusi hakerek paraser, prodús sumáriu mensál, komunikadu imprensa, halo audénsia, partisipa iha rede direitu umanu no justisa nasional no internasional no halo publikasaun iha mídia impresu no elektrónika, rádiu no televizaun.

Paraser ne'ebé JSMP prodús iha períodu 2020 nian hamutuk 2 mak hanesan Kriminaliza Difamasaun no Injúria; a) Opsaun alternativa ba solusaun situasaun política pós rejeisaun Proposta Lei Orsamentu Jerál Estadu 2020 no b) alterasaun daneen ba Kódigu Penál ne'ebé aprova ho Dekretu-Lei Nú. 19/2009.

Paraser kona-ba opsaun alternativa ba solusaun situasaun política pós rejeisaun Proposta Lei Orsamentu Jerál Estadu 2020 nian ne'e JSMP halo ho intensaun atu apresenta opsaun alternativa ba solusiona situasaun política depoisde OJE 2020 sumba iha PN. JSMP apresenta solusaun sira ne'e bazeia analiza ba Konstituisaun no lei relevante sira, liuliu Lei Orsamentu no Jestaun Finanseira.

Sumáriu atividade mensál ne'ebé JSMP prodús iha 2020 mak kona-ba rezultadu monitorizaun ba iha PN iha reuniaun plenária no Komisaun A nian. Iha sumáriu ne'e, JSMP mós fornese nia rekomentasaun ba iha PN bainhira iha kestaun ka asuntu rumo ne'ebé presiza fó solusaun ka hadi'a.


Iha 2020, JSMP halo audénsia ho entidade relevante sira mak hanesan JSMP ho Ministru Justisa hodi ko'alia kona-ba alterasaun daneen ba Kódigu Penál ne'ebé aprova ho Dekretu Lei Nú. 19/2009: Kriminaliza Difamasaun no Injuría. Alende halo audénsia mesak, JSMP mós hamutuk ho rede serbisu kontra kriminaliza difamasaun no injúria halo audénsia ho Ministru Konsellu Ministru hodi apresenta sosiedade sivil nia hanoin no posizaun. Rezultadu husi advokasia ne'e, prosesu ba alterasaun lei ne'e konsege trava ka pendente iha Ministériu Justisa.

JSMP mós iha 2020, prodús komunikadu imprensa lubuk ida kona-ba asuntu sira ne'ebé akontese iha Parlamentu Nasional no mós kona-ba kestaun sira ne'ebé komunidade sira foti durante JSMP hala'o treinamento iha suku remota sira. Komunikadu imprensa ne'e mós nu'udar meiu advokasia ida ne'ebé JSMP uza hodi hato'o nia hanoin, analiza no interpretasaun sira ba situasaun ka asuntu relevante rumo, inklui rekomentasaun rumo ba mundansa bainhira nesesáriu.

Treinamento ne'ebé JSMP hala'o iha 2020 ba iha membru Konsellu Suku no membru komunidade sira, inklui membru ema ho defisiénsia hamutuk 9 (sia). Suku sira mak JSMP hala'o treinamento ne'e mak hanesan Suku Uaguia Postu Administrativu Ossu, Munisípiu Vikeke, Suku Fuijoro Postu Administrativu Lospalos, Munisípiu Lautein, Suku Beiseuc, Postu Administrativu Tilomar, Munisípiu Covalima, Suku Hataz no Atabae Postu Administrativu Atabae, Bobonaro, Suku Cairui-Postu Administrativu Laleia no Suku Uma Naruk, Postu Administrativu Laclo, Munisípiu Manatutu, Suku Sagadate iha Postu Administrativu Laga, Munisípiu Baukau no Suku Fatumasi, Postu Administrativu Bazartete, Munisípiu Likisá.

Objetivu husi treinamentu ne'e mak atu hasa'e koñesimentu membru Konsellu Suku, membru komunidade no membru grupu ema ho defisiénsia kona-ba demokrasia, knaar órgaun soberanu sira-nian, partisipasaun públiku iha prosesu halo no asesu ba justisa formál.

JSMP sukat koñesimentu partisipante sira nian liuhusi kestionáriu pré no pós teste hodi hatene tuir sira-nia koñesimentu antes hala'o treinamentu no depoisde hala'o treinamentu. Rezultadu sira ne'e hanesan hatudu iha gráfiku sira tuir mai ne'e:



Iha gráfiku pós teste nian hatudu katak iha mudansa moderamente iha koñesimentu partisipante sira nian ba matéria ne'ebé JSMP hato'o iha treinamentu ne'e. Porsentajen la hatene nian tun husi 14% ba 3%, resposta sala husi 17% tun ba 11% no resposta loos sa'e husi 69% ba 86%.

Iha treinamentu sira ne'e, JSMP mós rejista preokupasaun komunidade sira-nian mak hanesan:

- a) kona-ba kazu krime no kazu sivil ne'ebé nia prosesu kle'ur liu no bainhira prosesu la'o kle'ur liu bele mós afeita ba vítima haluha ona faktu akontesimentu sira.
- b) sistema política ho modelu monarkia no república.
- c) kestaun tanba sá la halo eleisaun ba administradór postu sira.
- d) kestiona kona-ba prosesu sira oinsá sai na'in ba rai.
- e) kestaun atuasaun polísia nian ne'ebé sempre ho violénsia,
- f) kestaun kona-ba oinsa dalan ba prosesu kazu abandona labarik sira.
- g) kestaun kona-ba aplikasaun sistema demokráśia iha Timor-Leste ne'ebé livre tebes hodi hamosu inrespeitu iha vida moris lorloron nian entre komunidade sira.
- h) kestaun kona-ba kazu insestu ne'ebé nia número komesa sa'e aas no oinsá atu halo prosesu ba kazu ida ne'e.
- i) kestaun kona-ba asuntu empase política ne'ebé to'o agora laiha solusaun.
- j) kestaun eleisaun antesipada.
- k) kestaun krime violénsia doméstika ne'ebé mak akontese iha família no ikus ema seluk mak ba hato'o keixa.
- l) preokupasaun relasiona ho direitu no devér sira iha nasaun ne'ebé uza sistema demokrasia, nune'e mós oinsa prosesu kazu krime violénsia seksuál no violénsia doméstika inklui mós kazu sivil kona-ba na'in ba rai ne'ebé akontese iha sira nia suku no oinsa dalan atu halo prosesu kazu hirak ne'e tuir justisa formál.

- m) preokupasaun kona-ba Timor-leste harii partidu bara-barak no lei ne’ebé mak presiza regula hodi limita harii partidu político iha Timor-Leste.
- n) kestaun kona-ba oinsá halo prosesu ba kazu abandona labarik no oinsá ita rekoñese kazamento ne’ebé legál.
- o) kestaun kona-ba aplikasaun suspensaun ba pena prizaun sira ne’ebé dala barak halo komunitade sira konsidera lei la aplika ho di’ak.
- p) preokupasaun kona-ba polémika público nian ne’ebé husu atu hatún Prezidente Repúblika liuhusi dalan demostrasaun ne’ebé legál ka lae.
- q) kestaun entre lei formál ho kultura ida ne’ebé mak vale liu, sé mak tenke garantia direitu sidaun sira-nian, kazu ne’ebé rezolve iha suku ho konsentimentu husi parte rua bele simu malu ne’ebé viola lei ka lae.

Kestaun sira ne’ebé komunitade foti ne’ebé, JSMP fornese esplikasaun no fahe koñesimentu ho partisipante sira no kestaun balun JSMP dirije ba órgaun no instituisaun relevante sira liuhusi komunikadu imprensa no relatóriu sira.

Bazeia ba realidade ne’ebé JSMP deskreve ne’ebé, JSMP konklui hodi rekomenda ba Parlamentu Nasionál atu:

- 1) Dezenvolve Programa Nasionál Lejizlasaun ba iha kada Lejizlatura atu bele tau iha prioriedade lei importante sira ne’ebé iha tinan barak pendente nomós kaduka iha Parlamentu Nasionál mak hanesan Lei Reparaçao no Instituto Memoria Pública atu bele asegura justisa tranzitoria ba vítima krime pasadu nian; Lei Kriasaun Oden Advogadu nian hodi reforsa sistema judisiáriu no asesu ba justisa, Lei Podér Lokál no Desentralizasaun Administrativa no Lei Eleisaun Munisipál hodi bele asegura implementasaun política desentralizasaun administrativa, Lei Protesaun ba Labarik atu bele asegura no proteje ho di’ak direitu labarik sira nian, altera Kódigu Penál hodi kria artigu ketak ba insestu hodi bele proteje no promove valór morál Timor nian, altera Kódigu Sívıl atu inklui no rekoñese kazamento husi konfisaun religiozu sira seluk atu bele kumpri ho di’ak norma no prinsípiu sira K-RDTL no lei internasional sira ne’ebé Timor-Leste ratifika, liului kona-ba labele halo diskriminasaun tanba religiaun.
- 2) Ativa no efetiva iha identifika asuntu ka kestaun importante no pragmátku sira ne’ebé konsagra iha Konstituisaun hodi kria lei espesífiku no própria hodi bele asegura efetividade iha kumprimentu ba normál konstitutional sira ne’ebé.
- 3) Deputadu sira atu halo tuir Rejimento Parlamentu Nasionál nian hodi tama sai serbisu pontuál no dixiplina nune’ebé bele hatudu imajen di’ak ba público nu’udar órgaun soberano ne’ebé reprezenta povu no bele halo servisu ho di’ak atu bele aselara lei importante sira.
- 4) Parlamentu Nasionál tenke aplika sansaun dixiplinár ba membru deputadu ne’ebé viola Rejimento Parlamentu nian, nune’ebé bele prevene hahalok hanesan akontese iha futuru.
- 5) Evita no hamenus diskusaun no práktika política ne’ebé orientadu ba interese política partidáriu no kontra-produtivu ka vingansa política sira ne’ebé prejudika interese nasional.
- 6) Parlamentu Nasionál no instituisaun Estadu relevante sira atu envolve ativamente iha habelar informasaun kona-ba lei importante sira ne’ebé ligadu ba interese komunitade sira-

nian hanesan Lei Suku, Lei Titulár ba Sasán Imóvel, Lei Espropriasaun, Lei Ordenamentu Territoriu no Lei Kontra Violénsia Doméstika, nune'e bele tulun líder lokál no komunidade sira bele hatene oinsa trata asuntu sira ne'e bainhira akontese iha sira-nia suku ka komunidade.

- 7) Hadi'a mekanizmu audénsia pública sira iha prosesu apresiasaun lezislasaun sira, liuliu tenke sumariza informasaun xave sira iha esbosu lei ne'ebé presiza rona hanoin sira husi ema barak, liuliu parte relevante no interesadu sira.
- 8) Meu sira apresiasaun público nian ba esbosu lei sira tenke nakloke ba público atu bele asesu liuhusi mídia sira hanesan internet no meu seluktan ne'ebé adekuadu ba público bele envolve.
- 9) Kria lei própria ba suspensaun ba mandatu ka levantamento imunidade deputadu sira-nian tuir provizaun Artigu 94 K-RDTL no Artigu 8 Lei Nú. 15/2009 ne'ebé altera ho Lei Nú. 1/2016 kona-ba Rejimentu PN. Lei próprio ida ne'e bele deskreve ho detallu kona-ba tipu krime sira ne'ebé bele priexe kritériu atu hasai imunidade no mós kona-ba nia prosedimentu tantu político, administrativu no judisiál.
- 10) Deputadu sira tenke tane aas interesse nasional hodi evita interesse individuál no partidaria bainhira diskute no deside buat ruma relasiona ho interesse nasional.
- 11) Kria mekanizmu atu haree tuir ('*follow-up*') kona-ba saida mak Governu halo hodi hatan rekomendasau husi relatóritu fiskalizasaun no asuntu sira ne'ebé deputadu sira hato'o ka kestiona iha plenaria.
- 12) Halo alterasaun provizaun Artigu 1475 Kódigu Sivíl hodi bele asegura direitu sidadaun sira hotu nian atu asesu ba serbisu público Estadu nian relativamente ba dokumentu kazamentu husi konfisaun religiozu sira seluk alende Katóliku;
- 13) Intensifika fiskalizasaun política ba aktu lezislativu sira ne'ebé Governu dekreta atu nune'e bele grantia nia konstitusionalidade.
- 14) Esbosu lei sira tenke fornese mós iha lian ofisiál Tetum atu bele fasilita deputadu sira no mós audiénsia sira bele entende ho di'ak.
- 15) Proposta OJE kada tinan tenke iha mós versaun Tetun no sumariza pontu importante sira iha OJE ho lian Tetun hodi público bele asesu no kumprende.
- 16) Sekretáriu Jerál Parlamentu Nasional atu bele halo planu no inklui orsamentu ba hadi'a facilidade ka espasu servisu ne'ebé di'ak no appropriadu ba deputadu sira no funzionáriu sira atu asegura efetividade servisu Parlamentu Nasional nian.

I. Introdusaun

Programa Monitorizasaun ba Sistema Judisiáriu (JSMP)³ harii iha 2001 ho nia vizaun atu harii sosiedade demokrátika ida-ne'ebé garante justisa no direitu umanu ba ema hotu. JSMP nia misaun atu atinje nia vizaun ne'e mak servisu ho espíritu kolaborativu hodi promove no proteje demokrasia, lei, direitu umanu no justisa liuhusi monitorizaun, edukasaun legál no advokasia.

Unidade Programa Observasaun Parlamentu (POP) hari'i iha 2011 atu tau-matan no kontribui ba hadi'a funsionamentu Parlamentu Nasionál (PN) bainhira hala'o sira nia kna'ar nú'udar órgaun soberania Estadu ne'ebé reprezenta povu iha halo lei, fiskalizasaun no foti desizaun política sira. Alende ne'e, JSMP mós bele kontribui ho efetivu iha prosesu lejizlativu nian liuhusi audénsia no hato'o paraser ba Governu no PN atu asegura katak lei sira ne'ebé Governu propoin ba Parlamentu no lei sira ne'ebé Parlamentu rasik inísia no prodús bele refleta duni ba realidade, nesesidade ka interesse no aspirasaun povu tomak nian no mós asegura partisipasaun públiku nian iha prosesu halo lei sira ne'e.

Através husi programa ida-ne'e, JSMP mós habelar ka fahe informasaun relevante sira ne'ebé JSMP hetan husi Parlamentu no mós asuntu sira liga ho asuntu legál nian ne'ebé foka liu ba oinsa komunidade bele asesu ba justisa formál no asuntu demokráśia, kna'ar órgaun soberania sira no partisipasaun públiku iha prosesu halo lei ba membru konsellu suku, komunidade no grupu vulneravél sira iha baze hodi hasa'e sira nia koñesimentu sira iha área refere ho nune'e bele enkoraza povu atu bele partisipa ho ativu iha prosesu konstrusaun Estadu Direitu Demokrátiku.

Liuhusi atividade diseminasaun informasaun ne'e, JSMP mós kanaliza fali informasaun ka preokupasaun sira ne'ebé mak komunidade sira-nia hanoin, preokupa no rekomenda ba órgaun soberanu sira liuhusi audénsia no publikasaun sira.

Relatório anuál POP 2020 nian ida ne'e, sei deskreve atividade prinsipál haat mak hanesan monitorizaun ba PN, advokasia no treinamento ba konsellu suku, komunidade ho grupu vulneravél sira inklui halo analiza ba situsaun política no lezislativa sira iha PN iha tinan 2020.

Relatório ne'e halo mós analiza kona-ba situsaun política, lezislativa no akontesimentu importante sira iha PN iha tinan 2020 nian mak hanesan PN Sumba Orsamentu Jerál Estadu 2020, Kalamidade no Implementsaun Estadu Emerjénsia (EE), Mudansa Meza PN, Aprovasaun Lei Medida Prevensaun no Kombate Korrupsaun, Aprovasaun OJE 2020 no Aprovasaun OJE 2021 no asuntu sira seluktan.

Iha parte monitorizasaun ba PN, sei deskreve kona-ba kestaun produtividade PN ne'ebé ligadu ho pontualidade, prezensa deputadu sira-nian iha reuniaun plenária no Komisaun sira ho nia medida sira ne'ebé tuir rejimentu inklui produtividade PN iha halo lei, fiskaliza no foti desizaun política sira.

Iha parte advokasia, sei deskreve kona-ba paraser ne'ebé hato'o ba PN, Governu no instituisaun relevante sira seluk, komunikadu imprensa no publikasaun sira iha mídia imprensa.

³Bele vizita pájina web JSMP nian iha ne'e: www.jsmp.tl

Iha parte preokupasaun estruktura suku, komunidade no grupu vulneravél sira-nian, JSMP sei deskreve preokupasaun sira ne'ebé komunidade no grupu vulneravél sira nia preokupasaun iha treinamentu sira ne'ebé JSMP realiza. Preokupasaun sira ne'e, JSMP hakarak kanaliza ba órgaun soberania Estadu nian no instituisaun Estadu relevante sira liuhusi rekomendasau iha relatóriou ida ne'e.

Iha parte finál mak konstitui konkluzaun no rekomendasau ne'ebé JSMP hato'o ba PN no instituisaun relevante sira atu tau iha konsiderasaun hodi bele hadi'a funzionamentu sistema sira Estadu nian liga ho preokupasaun hirak ne'ebé JSMP hetan no rekomenda atu hadia.

Estrutura relatóriou ne'e mak hanesan tuir mai:

Parte 1 Introdusaun

Parte 2 Funzionamentu Parlamentu Nasional

Parte 3 Analiza Krítiku ba Situasaun Parlamentu Nasional iha tinan 2020

Parte 4 Advokasia

Parte 5 Preokupasaun Komunidade sira-nian

Parte 6 Konkluzaun no Rekomendasau

Parte 7 Aneksu

II. Parlamentu Nasionál

Parlamentu Nasionál nu'udar órgaun soberanu segundu Estadu Timor-Leste nian ne'ebé iha nia knaar prinsipál mak atu reprezenta povu tomak ho nia podér atu halo lei sira, halo fiskalizasaun no foti desizaun política hanesan prevee ona iha Artigu 92 Konstituisaun RDTL⁴. Konstituisaun mós atribui kompeténsia próprio ka eskluzivu ba PN hanesan prevee iha Artigu 95 Konstituisaun RDTL no kompeténsia sira seluk ne'ebé bele fahe ho Governu liuhusi autorizasaun hanesan prevee iha Artigu 96 Konstituisaun RDTL.

Alende, iha kompeténsia halo lei, Konstituisaun mós atribui kompeténsia sira seluk ba PN hodi halo apresiasaun ba diploma lejizlativu sira husi Governu hanesan prevee iha Artigu 98 Konstituisaun RDTL.

Parlamentu Nasionál bainhira ezerse nia podér no hala'o nia kna'ar sira tuir kompeténsia ne'ebé Konstituisaun atribui ne'e, PN presiza halo tuir enkuadramentu legál sira ne'ebé regula kona-ba nia estrutura, organizasaun, funsionamentu, administrasaun, jestaun no prosesu inkéritu parlamentár sira.

Lei sira ne'e mak hanesan Lei Nú. 4/2002 kona-ba Órganika Parlamentu Nasionál⁵ ne'ebé revoga ho Lei Nú. 15/2008⁶ ne'ebé revoga fali ho Lei Nú. 12/2017 kona-ba Lei Organizasaun no Funsionamentu Administrasaun Parlamentár⁷, Lei Nú. 4/2009 kona-ba Rejime Jurídiku ba Inkéritu Parlamentár⁸, Lei Nú. 15/2009⁹ ne'ebé altera ho Lei Nú. 1/2016 kona-ba Rejimentu Parlamentu¹⁰ no Lei Nú. 10/2016 ne'ebé Aprova Estatutu Funsionáriu Parlamentu Nasionál¹¹.

2.1. Plenária no reuniaun plenária

Plenária nu'udar forum ida ne'ebé aas liu iha PN hodi ezerse nia podér konstitutionál sira, liuliu iha halo lei, fiskalizasaun no foti desizaun política. Tuir provizaun Artigu 13 Lei Nú. 12/2017, plenária PN atribui mós kompeténsia sira seluk ba plenária atu aprova orsamentu anuál, orsamentu retifikativu, orsamentu privativu PN nian, halo apresiasaun ba Programa Governu, ba relatório konta ezekusaun jerál orsamentu estadu no planu estratéjiku plurianuál Parlamentu nian, relatório anuál Konsellu Administrasaun nian no relatório auditoria interna kona-ba konta PN nian.

⁴ Bele asesu iha ne'e versaun elektrónica Konstituisaun RDTL versaun Tetun:

http://www.mj.gov.tl/jornal/public/docs/ConstituicaoRDTL_tetum.pdf no Portugés:

http://www.mj.gov.tl/jornal/public/docs/ConstituicaoRDTL_Portugues.pdf

⁵ Bele asesu ba versaun elektrónica lei ne'e iha ne'e:

http://www.mj.gov.tl/jornal/public/docs/2002_2005/leis_parlamento_nacional/4_2002.pdf

⁶ Bele asesu ba versaun elektrónica lei ne'e iha ne'e:

http://www.mj.gov.tl/jornal/public/docs/2008/serie_1/serie1_no48.pdf

⁷ Bele asesu ba versaun elektrónica lei ne'e iha ne'e:

http://www.mj.gov.tl/jornal/public/docs/2017/serie_1/SERIE_1_NO_20.pdf

⁸ Bele asesu ba versaun elektrónica lei ne'e iha ne'e: http://www.mj.gov.tl/jornal/public/docs/2009/serie_1/serie1_no25.pdf

⁹ Bele asesu ba versaun elektrónica lei ne'e iha ne'e: http://www.mj.gov.tl/jornal/public/docs/2009/serie_1/serie1_no40.pdf

¹⁰ Bele asesu ba versaun elektrónica lei ne'e iha ne'e:

http://www.mj.gov.tl/jornal/public/docs/2016/serie_1/SERIE_1_NO_18.pdf

¹¹ Bele asesu ba versaun elektrónica lei ne'e iha ne'e:

http://www.mj.gov.tl/jornal/public/docs/2016/serie_1/SERIE_1_NO_26A.pdf

Tuir dadus ne'ebé JSMP hetan husi Sekretariadu Tékniku PN, totál ajenda reuniaun plenária hamutuk 85 iha tinan 2020¹² ne'ebé kompostu husi reuniaun plenária órdinária 63 no reuniaun plenária extra-órdinária 22 no JSMP konsege halo monitorizasaun hamutuk 72.

Gráfiku 1 Reuniaun plenaria entre 2018 no 2020



Reuniaun plenária ne'ebé JSMP monitoriza iha PN iha tinan 2020 nian mak kona-ba diskusaun no intervensaun deputadu sira-nian iha ajenda *antes ordem do dia*. Reuniaun ne'e hodi halo apresiasaun ba relatóriu fiskalizasaun, leitura ba pedidu sira kona-ba justifikasiada fulta husi deputadu sira, dekalrasaun política husi bankada parlamentares sira, *votu de pessar* no asuntu diversu sira.

Iha ajenda *orden do dia* plenária PN mós hala'o diskusaun no votasaun ba proposta lei no rezolusaun sira ne'ebé Govenu submete ba PN, projeto lei no projeto rezolusaun sira ne'ebé PN rasik inísia. Ajenda ne'e tantu iha reuniaun plenária normál no mós iha reuniaun plenária estraordinária.

Tuir JSMP nia observasaun deputadu sira balun ladún tau importânsia ba diskusaun no aprovisaun ba lei no rezolusaun sira, maski ida-ne'e mós sai nu'udar kompeténsia konstitusionál PN nian.

JSMP hanoin, PN presiza tau importânsia ne'ebé ekuilíbriu entre kompeténsia konstitusionál kona-ba halo lei, fiskalizasaun no foti desizaun política hanesan prevee iha Artigu 92 K-RDTL.

Nune'e, JSMP hanoin, atu evita práтика no atitude ne'ebé hanesan iha futuru, PN bele altera Rejimentu Parlamentu nian hodi atribui tan kompeténsia ba Meza Parlamentu Nasional hodi fó sansaun ba deputadu sira ne'ebé la kumpri Rejimentu hodi la partisipa iha diskusaun no votasaun ba lei sira iha *período ordem do dia* ka kria fali Komisaun Espesializada Permanente ida ne'ebé bele trata kona-ba kestaun étika no dixiplina deputadu sira-nian. Komisaun ne'e bele atribui kompeténsia hodi halo investigasaun no apresenta relatóriu paraser ba Meza Parlamentu hodi foti desizaun.

¹² Bele haree iha website Parlamentu: <https://www.parlamento.tl/node/405>

2.2. Pontualidade

Pontualidade nu'udar fatór importante ida ne'ebé determina efetividade no produtividade PN nian. Alende fatór sira seluk hanesan koñesimentu língua Portugés, espesu serbisu no planu lejizlasaun nasionál.

Oráriu ba serbisu PN nian relativamente reuniaun Plenária no Komisaun Espesializada Permanente (KEP) sira-nian prevee iha pontu 2) Artigu 46 Lei Nú. 15/2009 ne'ebé altera ho Lei Nú. 1/2016 kona-ba Rejimentu PN. Iha provizaun ne'e, prevee katak oras ba hahú reuniaun Plenária no KEP nian mak iha parte dadersan hahú husi tuku 09:00 to'o 12:30 no iha parte lokraik hahú tuku 15:00 to'o 18:00.

Durante monitorizasaun JSMP nian iha 2010, deskobre katak kestaun pontualidade serbisu sai nu'udar preokupasaun sériu ne'ebé públiku no JSMP kestiona bebeik liuhusi komunikadu imprensa no mós relatóriu anuál sira.

Problema pontualidade kontinua fó impaktu negativa boot ba produtividade Parlamentu iha prosesu halo lei, fiskalizasaun no foti desizaun política ba interese nasionál. Bainhira membru deputadu sira rasik la pontuál mak sei fó impaktu ba “*kuórum*” funzionamentu iha Plenária no KEP sira atu halo reuniaun no halo deliberasaun ruma tuir ajenda ne'ebé iha ona.

Tuir provizaun pontu 1) Artigu 47 kona-ba reuniaun Plenária, ejize mínimu prezensa 1/3 husi deputadu sira ne'ebé efetivu iha funsaun ka mínimu deputadu 21 husi deputadu efetivu 65. Enkuantu iha pontu 2) kona-ba halo deliberasaun iha Plenária ejize prezensa mínimu liuhusi metade (1/2) husi deputadu sira ne'ebé efetivu iha funsaun ka mínimu deputadu 33 husi deputadu efetivu 65.

Enkuantu kuórum ba reuniaun no deliberasaun ba KEP sira-nian tuir provizaun pontu 5) Artigu 47 katak reuniaun komisaun bele hahú ho prezensa deputadu na'in 3 no deliberasaun bele halo ho prezensa liuhusi metade (1/2) membru sira ne'ebé efetivu iha funsaun.

Durante monitorizasaun JSMP nian iha 2020, iha reuniaun plenária no Komisaun A nian nunka akontese tuir oras serbisu ne'ebé hahú tuku 09:00 to'o 12:30 no iha parte lokraik hahú tuku 15:00 to'o 18:00. Reuniaun sira akontese barak liu iha tuku 10:00 to'o 13:00 no iha parte lokraik hahú tuku 16:00 to'o 18:00.


Relasiona ho kestaun ne'e, JSMP frekuemente rekomenda iha nia relatório sira atu Parlamentu bele foti asaun hasoru deputadu sira ne'ebé la dixiplina tuir tempu ne'e, nune'e bele fó solusaun ba problema ne'e no prevene deputadu sira seluk atu halo erru ne'ebé hanesan iha futuru.

2.3. Prezensa

JSMP nia observasaun ba prezensa deputadu sira-nian iha reuniaun plenária bazeia ba dadus prezensa deputadu sira-nian hahú husi Janeiru-Dezembru 2020.

Iha gráfiku tuirmai, JSMP sei apresenta deputadu sira-nia prezensa iha plenária tuir kategoria tolu mak hanesan prezensa totál (PT), falta injustifikadu (FI) no falta justifikadu (FJ). Dadus sira ne'e JSMP hetan husi PN liuhusi Diresaun Apoiu Parlamentár, Divizaun Apoiu Plenáriu nian.

Gráfiku 2: Prezensa Deputadu sira-nian iha reuniaun plenaria iha entre 2018 no 2020¹³



Bazeia ba gráfiku iha leten, iha mudansa pozitivu relasiona ho falta injustifikadu deputadu sira-nian. Iha 2018, durante fulan 5 nia laran de’it, número deputadu ne’ebé falta injustifikadu tutuir malu liu husi loron 5 ba leten hamutuk 16, iha 2019 tun ba 5 no iha 2020 tun ba mamuk ka zero. Tuir provizaun alinea a) pontu 1) Artigu 7 Rejimentu Paramentu nian kona-ba lakon mandatu, deputadu ne’ebé la foti nia asentu parlamentár la ho justifikasaun iha sesaun plenaria dala haat tutuir malu ka falta injustifikadu iha reuniaun plenaria ka Komisaun nian dala lima tutuir malu ka falta injustifikadu ho interkalada dala 15 sei lakon mandatu nu’udar deputadu.

Mezmuke Rejimentu ne’e regula hanesan ne’e, tuir observasaun JSMP nian, PN la foti asaun hasoru deputadu sira ne’ebé halo infrasaun hasoru Rejimentu ne’e. Nune’e, JSMP dala barak iha nia publikasaun sira, husu ba PN atu bele foti asaun konkreta hasoru membru deputadu sira ne’ebé la kumpri Rejimentu Parlamentu nian, atu bele evita atitude no práтика ne’ebé hanesan mosu iha futuru ne’ebé bele fó impaktu maka’as ba funzionamento no produtivididade Parlamentu nian.

2.4. Direitu ba uzu palavra

Uzu palavra nu’udar direitu deputadu ida nian ne’ebé prevee iha provizaun Artigu 57 Rejimentu Parlamentu. Uzu palavra ne’e atribui ba deputadu sira hodi halo intervensaun iha *período antes ordem do dia* no *ordem do dia*, partisipa iha debate, apresenta projeto lei, rezolusuan no deliberasaun, ezerse direitu hodi halo defeza ba onra ba naran di’ak partidu, interpór rekursu, halo pedidu esclarecemento, apresenta reclamação no protesto, fórmula deklarasaun votu no uza palavra ne’e konforme orden inskrisaun.

¹³ Iha fulan Novemburu PN iha ajenda reuniaun plenaria rua maibé konsege realiza reuniaun plenaria ida de’it. JSMP la konsege hetan dadus prezensa reuniaun ida ne’e nian, nune’e la hatama iha gráfiku iha leten ne’e.

Uzu palavra husi deputadu sira-nian hala'o iha plenária iha Segunda-feira no Tersa-feira tuir provizaun pontu 1) Artigu 45 Rejimentu Parlamentu nian, inklui mós plenária extra-ódinaria sira ba asuntu sira ne'ebé urjénti tuir provizaun Artigu 49 Rejimentu Parlamentu Nasionál.

JSMP nota katak intervensaun deputadu sira nian iha reuniaun plenária sira dala barak fó prioriedade liu ba interese partidária duke interese Estadu no povu nian. Intervensaun sira mós dala barak la tuir asuntu sira ne'ebé plenária ajenda hodi hamosu diskusaun sira desnesesáriu no mós hasai linguazen sira ne'ebé la appropriadu no la etíku no mós diskriminativu ba promove fali *rasista* ne'ebé la adukativu ba públiku hanesan ema politiku¹⁴.

Aktu ida ne'e kontráriu ho provizaun Artigu 16 Konsituisaun R-DTL kona-ba universalidade no igualdade ne'ebé iha pontu 1) prevee katak sidadaun hotu-hotu hanesan iha lei nia oin, no mós iha direitu no obrigasaun hanesan no pontu 2) prevee katak labele halo diskriminasaun ba ema ida tanba nia kulit, nia rasa, nia estadu sivíl, nia seksu, orien étniku, nia lian, pozisaun sosiál eh ekonómiku, hanoin político ka ideolojia, religiaun, instrusaun eh nia kondisaun fízika eh mentál.

Limitasaun kona-ba direitu ba uzu palavra ne'e prevee ho klaru no detallu iha provizaun Artigu 65 husi Lei Nú. 15/2009 kona-ba uzu indevidu ba palavra. Iha provizaun sira husi alinea a) to'o f) prevee katak Prezidente PN bele aviza ka fó-hanoin ba deputadu ne'ebé uza palavra bainhira konstitui hahalok sira tuir mai ne'e:

- a) ses husi ajenda ordem do dia nian ka asuntu ne'ebé debate hela;
- b) ko'alía liu ona husi tempu ne'ebé fó ba nia;
- c) ko'alía ka uza palavra la ho autorizasaun;
- d) ofende dignidade Parlamentu no deputadu sira-nian;
- e) uza liafuan ne'ebé la própriu, insulta ka ofensivu ba moral no
- f) Halo insulta no ameasa ba integridade fízika ka morál husi kualkér deputadu.

Iha provizaun pontu 2) Artigu 65 nian ne'e prevee limitasaun ne'ebé maka'as liutan bainhira deputadu ne'ebé uza palavra ne'e la rona avizu husi Prezidente Parlamentu. Provizaun ne'e prevee katak bainhira deputadu ne'ebé mak ko'alía ne'e kontinua nafatin ho nia komportamentu ne'e, Prezidente Meza Parlamentu bele foti husi nia direitu ba uzu palavra ne'e to'o sesaun plenária ne'e hotu no la taka dalan ba eventuál prosesu judisiál hasoru hahalok deputadu ne'e nian.

JSMP haree katak provizaun Artigu 65 Rejimentu Parlamentu nian ne'e di'ak ona, maibé atu sai di'ak liu tan no bele rezolve problema hanesan ne'ebé beibeik akontese iha plenária, presiza altera ka hadi'a provizaun pontu 2) husi Artigu 65 ne'e hodi inklui tan "prosesu dixiplinár" Alende "prosesu judisiál". Prosesu judisiál ne'e akontese bainhira hahalok deputadu ne'e todan liu ona no kontra ona provizaun Kódigu Sivíl no Penál.

2.5. Interese partidáriu versu interese nasionál

Iha parte seluk, JSMP nota mós katak husi reuniaun sira iha plenária PN nian, deputadu sira alende hatuduk hahalok sira ne'ebé kontráriu ho Konstituisaun no lei sira hanesan temi ona iha leten, dala barak mós bainhira halo debate no aprova ka vota kontra lei no rezolusaun ruma

¹⁴ Bele haree iha komunikadu JSMP iha website: <https://jsmp.tl/wp-content/uploads/PR-Atitude-membru-deputadu-PN-la-tuir-K-RDTL-no-lei.pdf>

bazeia de'it ba orientasaun política husi partidu ka lideransa partidu nian duke halo analiza kle'an no profunda ba lei sira atu bele asegura katak desizaun ne'ebé Parlamentu foti refleta duni realidade, nesesidade, interesse no aspirasaun povu tomak nian ka reprezenta interesse nasional.

JSMP nota katak aktu sira ne'e akotese, alende iha tinan sira anteriór, iha diskusaun sira ba aprovisaun Orsamentu Jerál Estadu 2020 no mós 2021 iha jeneralidade inklui mós lei sira seluk. Iha diskusaun no aprovisaun, JSMP nota katak deputadu sira barak mak halo intervensaun no vota la ho konsiénsia. JSMP mós hatene katak deputadu sira reprezenta político no interesse partidu nian tuir ideolojia política partidu nian. Mezmu nune'e, iha kontestu Timor-Leste nian, intervensaun política partidu política sira-nian, dala barak la hatudu ho klaru ideolojia política partidu ida nian nu'udar partidu ho ideolojia política “eskerda ka sosialista/komunista, moderadu no direta ka kapitalista”. Nune'e, intervensaun sira ne'e dala barak liu la refleta ba interesse nasional, maibé interesse sujetiva grupu ka individu rumá partidu nian.

Vota tuir orientasaun ka orden política bankada partidu nian regula iha provizaun alinea c) pontu 1) Artigu 16 Lei Nú. 9/2017 ne'ebé prosede alterasaun ba Lei Nú. 6/2006 kona-ba Lei Eleitoral Parlamentu Nasional. Provizaun ne'e ne'e prevee katak deputadu sira ne'ebé eleitu tuir lista ne'ebé apresenta husi partidu ka koligasaun partidária sei lakon mandatu bainhira viola dixiplina bankada parlamentár ne'ebé entegra ba tuir termu Estatutu partidu ne'ebé pertense ba.

JSMP haree katak implikasaun husi lei refere ba mós ba kredibilidade no produtividade indívidu husi deputadu sira-nian nu'udar ema ne'ebé reprezenta povu tomak iha órgaun soberania Estadu nian bainhira hala'o sira-nia knaar atu halo lei rumá, fiskaliza no halo desizaun política durante sira-nia mandatu.

Alende ne'e, aktu ne'e sei hamosu mós *atitude apatis* husi deputadu balun hodi lakohi envolve iha diskusaun ba asuntu sira ligadu ho interesse povu no Estadu nian hodi hein de'it orientasaun husi partidu ka grupu hodi halo desizaun política iha PN.

Nune'e, JSMP hanoin katak provizaun alinea c) pontu 2) Artigu 16 Lei Nú. 9/2017 nian ne'e la dun refleta ho di'ak realidade política Timor-Leste nian, nune'e bainhira aplika la hatudu rezultadu ne'ebé di'ak ba NASAUN no povu no ne'ebé dala barak kria de'it konfuzau no problema ba NASAUN. Provizaun ne'e bele aplika ho di'ak iha faze ida ne'ebé partidu política sira Timor-Leste nian define no hatudu ho klaru sira-nia pozisaun no ideolojia política hanesan ho NASAUN avansadu sira iha Europa no Amérika, liuliu hanesan Estadus Unidos. Tanba ne'e, JSMP hanoin, PN presiza tetu no haree didi'ak hodi hadi'a provizaun ida ne'e atu bele refleta ho di'ak ba realidade Timor-Leste nian atu bele kria espasu ne'ebé luan ba deputadu sira hodi bele kontribui ho ativamente ba efetividade no produtividade PN nian.

Relaciona ho realidade sira akontese iha PN nian, JSMP dalabarak mós kestiona liuhusi publikasaun sira JSMP nian hanesan komunikadu imprensa, sumáriu atividade mensál no relatóriu anuál sira.

Kestaun sira ne'ebé JSMP foti ne'e hahú kellas ho uza linguajen ne'ebé la apropiadu, halo movimentu tun-sa'e durante plenáriu no mós diskusaun individuál entre deputadu sira, diskusaun grupu iha li'ur maski oras plenária hahú ona, atende *video call* mezmu iha ona alarme hodi hahú

ona plenáriu. Deputadu sira ne'e ignora regra no prosedimentu ne'ebé aplika iha PN, inklui oras tama sai serbisu nian ka pontualidade.

JSMP hanoin importante ba Meza Parlamentu atu sosializa no reintrodús ka fó-hanoin filafali ka bebeik iha kada inísiu sesaun lejizlativa prosedimentu sira ne'e ba deputadu sira hodi evita no prevene deputadu sira uza linguajen ne'ebé la étiku no nakonu ho karáker insulta iha PN ne'ebé viola regra sira Rejimentu Parlamentu nian¹⁵.

2.6. Fiskalizasaun

Knaar fiskalizasaun PN nian hala'o bazeia ba provizaun Artigu 92 Konstituisaun R-DTL nian ne'ebé prevee katak PN mak órgaun soberania Repúblika Timór-Leste nian ne'ebé reprezenta ema Timor-oan tomak, iha kbiit atu halo lei, fiskalizasaun no foti desizaun política.

Fiskalizasaun PN nian kompostu husi fiskalizasaun política no fiskalizasaun tékniku no serbisu. PN liuhusi fiskalizasaun política hala'o nia knaar másimu hodi garante Konstituisaun no Lei sira. Fiskalizasaun tékniku no serbisu hodi asegura ezekusaun programa no orsamentu Estadu nian tuir lei sira orsamentu estadu no jestaun finanseira. Fiskalizasaun téknika no serbisu hala'o husi KEP sira tuir área dominiu idaidak nian iha setór edukasaun, saúde, ekonomia, agrikultura, justisa, nsst.

Aktu sira fiskalizasuan política Parlamentu nian mak hanesan halo apresiasaun ba programa Governu hanesan prevee iha Artigu 109 K-RDTL, fó votu konfiansa, inísia mosaun sensura, halo rekerimentu ba Governu hodi husi esklaresimentu ba asuntu rumo, inísia debate sira ho Governu molok termina período normál, hato'o petisaun, kria inkéritu parlamentár no apresiasaun ba aktu lezislativu ne'ebé Governu dekreta.

Detallu husi prosesu orientasaun no fiskalizasaun política regula ho klaru no detallu iha provizaun artigu sira ne'ebé konstitui iha Sesaun I to'o IX husi Kapítulu VI Título V ka husi Artigu 134-161 Rejimentu Parlamentu Nasional nian.¹⁶

Parlamentu Nasional halo apresiasaun ba programa Governu bazeia ba iha Artigu 109 Konstituisaun R-DTL no iha prazu loron 30 depoisde Governu hahú nia funsaun tuir Artigu 108 Konstituisaun RDTL ho nia detallu prosesu prevee iha Artigu 135 Rejimentu Parlamentu Nasional.

Votu konfiansa, Governu mak bele husu ba PN atu halo aprovasaun ba votu konfiansa ida kona-ba deklarasaun política jerál nian no ba asuntu seluk importante ida ne'ebé ba interesse nasional tuir provizaun Artigu 110 K-RDTL ho nia detallu prosesu hanesan prevee iha provizaun Artigu 137-139 Rejimentu Parlamentu Nasional.

Mosaun sensura, ho iniciativa deputadu baluk-haat ida ¼ ne'ebé sei hala'o hela knaar, PN bele halo votu mosaun sensura ida ba Governu, kona-ba nia programa ka buat seluk ne'ebé relevante ba interesse nasional bazeia ba Artigu 111 K-RDTL ho nia detallu prosesu sira prevee iha Artigu 140-142 Rejimentu Parlamentu Nasional.

¹⁵ Bele haree iha website JSMP: http://jsmp.tl/wp-content/uploads/PrPWPParlamentuUzaLiafuanLaETIKU_Tetum.pdf

¹⁶ Bele asesu iha website Parlamentu Nasional:

<https://www.parlamento.tl/sites/default/files/custom/docs/regimento do parlamento nacional de timor-leste.pdf?language=pt-pt>

Pergunta ba Governu no rekerimentu nu'udar atividade fiskalizasaun política ne'ebé mak deputadu sira halo hodi husu ba membru Governu bazeiadu ba provizaun Artigu 101 K-RDTL atu partisipa iha reuniaun sira plenária nian hodi halo esklaresimentu ba informasaun sira ne'ebé kabe ba máteria husi membru Governu tuteladu nia responsabilidade. Pergunta ba Governu hala'o fulan ida dala ida no rekerimentu ne'ebé deputadu ka entidade público sira halo hodi hetan informasaun tenke hetan resposta husi Governu iha loron 30 nia laran. Detallu husi nia prosesu prevee iha provizaun Artigu 149 no 150 Rejimentu Parlamentu.

Alende halo pergunta ba Governu, PN mós halo debate ho Governu. Debate ho Governu ne'e sei halo ho Primeiru Ministru no mós ho membru Governu sira. Debate hirak ne'e sei hala'o iha molok hakotu período normal funzionamento PN nian iha sesaun lejizlativa ida nia tempu ho nia detallu prosesu hanesan prevee iha Artigu 151 no 152 Rejimentu Parlamentu nian.

Petisaun nu'udar direitu sidadaun sira-nian ida ne'ebé konsagra iha provizaun Artigu 48 K-RDTL kona-ba direitu ba petisaun. Provizaun ne'e prevee katak ema ida-idak iha direitu atu apresenta petisaun, keixa ka reklamasau ba órgaun soberanu sira ka autoridade naran ida atu defende nia direitu, Konstituisaun, lei ka interesse jerál. Prosesu atu halo petisaun prevee iha provizaun sira Artigu 155 to'o 160 Rejimentu Parlamentu Nasional. Bainhira PN apresia petisaun ne'ebé sidadaun sira hato'o, Parlamentu bele husu ka rekomenda ba Governu hodi halo tuir interesse sidadaun sira-nian ka bele kria fali enkuadramento legál ruma hodi regula interesse sira povu nian.

InkérITU parlamentár nu'udar mekanizmu fiskalizasaun ida ne'ebé ho obejtivu atu asegura kumprimentu ba Konstituisaun no lei sira, no apresia aktu sira Governu no Administrasaun Pública nian. InkérITU parlamentár ne'e sei hala'o husi Komisaun Eventuál ne'ebé estabelese ba asuntu ida liuhusi Rezolusaun Parlamentu nian no regula iha provizaun Artigu 161 Rejimentu Parlamentu.

Apresiasaun parlamentár ba aktu lezislativu nu'udar mekanizmu kontrolu ka fiskalizasaun ne'ebé Konstituisaun atribui ba PN hodi halo alterasaun ba Dekreitu Lei ruma ne'ebé Governu aprova ona ka hamate tiha ka suspende parte balun ka totalmente nia vijénsia hanesan prevee ho detallu iha provizaun Artiu 98 K-RDTL.

Rekerimentu atu halo apresiasaun parlamentár ne'e hatama iha forma eskrita ba iha PNho mínimo deputadu 1/5 husi deputadu sira ne'ebé efetivu iha funsaun iha período loron 30 diploma ne'e publika iha Journál Repúblika, la sura ho tempu suspensu ba funzionamento Parlamentu nian.

Observasaun JSMP nota katak fiskalizasaun política seidauk la'o ho efetivu no eficiente. Depoide formasaun Governu no Governu apresenta nia programa no hetan ona apresiasaun no votu konfiansa husi PN, Parlamentu la tau importânsia ba iha asuntu sira kona-ba debate ho membru Governu, debate ho Primeiru-Ministru, kestaun petisaun sira, hamosu inkérITU parlamentár no halo apresiaun ba aktu lezislativu sira husi Governu.

Nune'e, JSMP hanoin katak Parlamentu persiza atu tau prioridade ba iha asuntu hirak ne'ebé JSMP mensiona iha leten liuliu kona-ba atu hakle'an liutan Parlamentu nia serbisu iha halo apresiasaun ba aktu lezislativu sira husi Governu ne'ebé ho durasaun tempu loron 30 de'it ne'ebé

sura hahú husi publikasaun iha Journál Repúblika hanesan prevee iha provizaun pontu 1) Artigu 98 K-RDTL.

Ho nune'e, JSMP hanoin, di'ak ba Parlamentu atu kada semana bele atualiza iha reuniaun plenaria Dekretu Governu ne'ebe prodús liuhusi halo leitura no nune'e, deputadu sira atualizadu ho diploma lejizlativu sira Governu nian no mós karik buat ruma la loos no la di'ak, deputadu sira bele hatama kedes rekerimentu ba apresiasaun. Mekanizmu ida ne'e nu'udar forma ida efetivu iha serbisu fiskalizsaun Parlamentu nian.


2.7. Produtividade

Produtividade nu'udar pontu prinsipál ida ne'ebé sai hanesan sasukat iha instituisaun ida hodi sukat nia atinjimentu ba nia meta sira iha kada tinan tuir programa no planu sira ne'ebé instituisaun ida planea ona. Produtividade nu'udar mós sasukat atu bele halo komparasaun ba rezultadu sira ne'ebé atu atinjé ka atinjé tiha ona husi rezultadu atividade ne'ebé realiza ona.

Produtividade PN iha 2020 iha serbisu lezislasaun nian, Parlamentu konsege aprova lei no rezolusaun lubuk ida iha reuniaun sira plenária nian. Iha parte fiskalizasaun nian, PN liuhusi Komisaun Espesializada Permanente sira halo vizita fiskalizasaun balun iha munisípiu, postu administrativu, suku no instituisaun independente sira Estadu nian. Rezultadu husi fiskalizasaun ne'e relata ba iha plenária no hetan apresiasaun ba iha rekomendasau sira husi relatório fiskalizasaun nian ne'e.

Parlamentu Nasional iha tinan 2020 prodús lei hamutuk 15, rezolusaun sira hamutuk 10 no fiskalizasaun hamutuk 35 husi Komisaun Espesializada Permanente 6.

Gráfiku 3 Produtividade Parlamentu iha halo lei, fiskalizasaun no foti desizaun política¹⁷



Iha tinan 2020, Komisaun Espesializada Permanente ne'ebé trata asuntu Konstitusionál, Justisa, Administrasaun Pública, Podér Lokál no Lezislaun labele halo fiskalizasuan iha baze tanba hetan autorizasaun husi Prezidente Parlamentu atu aselera prosesu diskusaun ba esbosu Lei Medida sira Prevensaun no Kombate Korrupsaun iha espesialidade no halo audensia pública ba esbosu Lei Podér Lokál no Desentralizasaun Administrativa no Lei Eleisaun Asembleia Munisipál¹⁸.

¹⁷ JSMP labele asesu ba Komisaun B nian tanba konsidera sijiliu tanba ne'e JSMP labele fó asesu ba público.

¹⁸ Atu hatene kompletu kona-ba lei sira ne'e, bele haree iha tablete sira iha aneksu.

III. Prosesu Lejizlativu

3.1. Diskusaun no aprovasaun ba Lei sira

Parlamentu Nasional iha tinan 2020, liuhusi reuniaun plenária normál no extra-ordinária konsege aprova lei no rezolusaun sira ne'ebé Governu no PN propoin ne'ebé hamutuk lei 15 no rezolusaun 10. Entre número sira ne'e, PN inísia rasik hamutuk 25.

Lei sira ne'e mak hanesan:

- 1) Lei Nú.1/2020 kona-ba Autorizasaun Deklarasaun Estadu Emerjénsia¹⁹.
- 2) Lei Nú.2/2020 kona-ba Autorizasaun ba Realizasaun Transferênsia Extra-ordinária ida ba Fundu Petrolíferu²⁰.
- 3) Lei Nú.3/2020 kona-ba Autorizasaun Renovasaun ba Deklarasaun Estadu Emerjénsia²¹.
- 4) Lei Nú.4/2020 kona-ba Autorizasaun Renovasaun ba Deklarasaun Estadu Emerjénsia²².
- 5) Lei Nú.5/2020 kona-ba Autoriza ba realizasaun segunda Transferênsia Extraordinária ba Fundu Petrolíferu iha tinan finanseiru 2020 no prosede Altersaun primeira ba Lei Nú.2/2020, de 6 de abril²³, sobre Autorizasaun ba Realizasaun Transferênsia Extraordinária ida ba Fundu Petrolíferu.
- 6) Lei nú.6/2020 kona-ba Konfirmasaun ba Deklarasaun Estadu Emerjénsia²⁴.
- 7) Lei nú.7/2020 kona-ba Medida sira Prevensaun no Kombate Korrupsaun²⁵.
- 8) Lei nú.8/2020 kona-ba Autorizasaun Renovasaun ba Deklarasaun Estadu Emerjénsia²⁶.
- 9) Lei nú.9/2020 kona-ba Autorizasaun Renovasaun ba Deklarasaun Estadu Emerjénsia²⁷.
- 10) Lei no. 10/2020 kona-ba Orsamentu Jerál Estadu ba 2020²⁸.
- 11) Lei nú.11/2020 kona-ba Autorizasaun Renovasaun ba Deklarasaun Estadu Emerjénsia²⁹.
- 12) Lei nú.12/2020 kona-ba Lei ba Protesaun Sivil³⁰.
- 13) Lei nú.13/2020 kona-ba Autorizasaun Renovasaun ba Deklarasaun Estadu Emerjénsia³¹.
- 14) Lei Nú.14/2020 kona-ba Orsamentu Jerál Estadu ba 2021³² no;

¹⁹ Bele asesu iha website jornal da república:
http://www.mj.gov.tl/jornal/public/docs/2020/serie_1/SERIE_1_NO_13_A.pdf

²⁰Bele asesu iha website jornal da república:
http://www.mj.gov.tl/jornal/public/docs/2020/serie_1/SERIE_1_NO_14_C.pdf

²¹Bele asesu iha website jornal da república:
http://www.mj.gov.tl/jornal/public/docs/2020/serie_1/SERIE_1_NO_17_A.pdf

²²Bele asesu iha website jornal da república:
http://www.mj.gov.tl/jornal/public/docs/2020/serie_1/SERIE_1_NO_22_A.pdf

²³Bele asesu iha website jornal da república:
http://www.mj.gov.tl/jornal/public/docs/2020/serie_1/SERIE_1_NO_26_C.pdf

²⁴Bele asesu iha website jornal da república: http://www.mj.gov.tl/jornal/public/docs/2020/serie_1/SERIE_1_NO_33.pdf

²⁵ Bele asesu iha website jornal da república: http://www.mj.gov.tl/jornal/public/docs/2020/serie_1/SERIE_1_NO_35.pdf

²⁶Bele asesu iha website jornal da república:
http://www.mj.gov.tl/jornal/public/docs/2020/serie_1/SERIE_1_NO_36_B.pdf

²⁷ Bele asesu iha website jornal da república:
http://www.mj.gov.tl/jornal/public/docs/2020/serie_1/SERIE_1_NO_40_B.pdf

²⁸ Bele asesu iha website jornal da república:
http://www.mj.gov.tl/jornal/public/docs/2020/serie_1/SERIE_1_NO_42_A.pdf

²⁹Bele asesu iha website jornal da república:
http://www.mj.gov.tl/jornal/public/docs/2020/serie_1/SERIE_1_NO_43_D.pdf

³⁰Bele asesu iha website jornal da república:
http://www.mj.gov.tl/jornal/public/docs/2020/serie_1/SERIE_1_NO_49.pdf

³¹Bele asesu iha website jornal da república:
http://www.mj.gov.tl/jornal/public/docs/2020/serie_1/SERIE_1_NO_49_A.pdf

15) Lei Nú.15/2020 kona-ba Autorizasaun Renovasaun ba Deklarasaun Estadu Emerjénsia³³.


Maioria husi lei sira ne'e kona-ba deklarasaun Estadu Emerjénsia (EE) relasiona ho pandemia Covid-19 nian. Lei importante sira ne'ebé PN konsege diskute no aprova iha tinan 2020 mak hanesan Lei Prevensaun no Kombate Korrupsaun, Lei Protesaun Sivíl no Lei Orsamentu Jerál Estadu 2020 no 2021.

Relasiona ho lei sira kona-ba EE, tuir JSMP nia hanoin, nu'udar asaun Estadu Timor-Leste nian ida ne'ebé pozitivu, importante no próprio hodi responde ba pandemia Covid-19 iha termu prevensaun no kombate nian. Nune'e, JSMP apresia aas tebes esforsu Estadu nian ne'e, partikularmente Presidente Repúblika, Governu no Parlamentu Nasional iha kria mekanizmu legál sira ne'e.

JSMP mós hanoin no konsidera importante mós ho lei sira OJE 2020 no 2021. Liuhusi aprovasaun ba lei OJE 2020 no 2021 nian ne'e, bele iha sustentabilidade ba funzionamento Estadu iha termu finansia mákina estadu, hatan situasaun Covid-19, dezastre naturál no liuliu dezenvolvimentu nasional.

Alende ne'e, Lei nú. 7/2020, 26 Agostu kona-ba Medida sira ba Prevene no Kombate Korrupsaun sai mós nu'udar lei ida ne'ebé estremamente importante. JSMP haree no hanoin katak ho lei ida ne'e bele tulun Estadu no parte hothotu atu ezkuta orsamentu Estadu nian ho responsabilidade, transparente no akontavel, nune'e bele salvaguarda interese Estadu no osan povu nian husi otas ba otas, no liu tan husi ne'e, bele liberta povu hothotu husi ki'ak no mukit.

Gráfiku 4 Variasaun número lei no rezolusaun entre 2018-2020



Iha termu produtividade, Gráfiku iha leten hatudu katak iha 2020, Parlamentu Nasional iha produtividade, mezmuke maioria husi lei sira ne'e kona-ba deklarasaun EE.

³²Bele asesu iha website jornal da repúblika:

http://www.mj.gov.tl/jornal/public/docs/2020/serie_1/SERIE_1_NO_52A.pdf

³³ Bele asesu iha website jornal da repúblika:

http://www.mj.gov.tl/jornal/public/docs/2020/serie_1/SERIE_1_NO_53.pdf

Mudansa pozitivu ida ne'e, tuir JSMP nia haree relasiona ho mudansa iha lideransa Meza Parlamentu iha 19 Maiu 2020 no mós lideransa iha Komisaun Espesializada Permanente sira. Maski nune'e, tuir JSMP nia haree Parlamentu Nasionál kontinua laiha planu lezislasaun Nasionál.

Iha fulan Janeiru to'o inísiu Maiu 2020, PN la funsiona ho di'ak no la dun iha produtividade. Ida ne'e akontese tanba depoisde Orsamentu Jerál Estadu 2020 sumba iha Janeiru 2020, PN hamosu presedénsia política oin-oin ne'ebé resulta husi membru Koligasaun Aliansa Maioria Parlamentár (AMP) ne'ebé lideradu husi partidu CNRT naksobu.

Nune'e, liuhusi diskusaun no koordensaun sira husi partidu sira ne'ebé hetan asentu iha PN, ikus mai hamosu opsaun hodi viabiliza Governu Konstitusionál VIII husi Partidu Fretilin. Ida ne'e sai nu'udar solusaun ba Prezidente Repúblika atu evita eleisaun antesipada no kontinua mantein ho Governu Konstitusionál VIII.

JSMP haree katak husi aliansa foun iha PN fó prioridade tebes ba lei importansia sira ne'ebé durante ne'e kaduka no la dun hetan atensaun no interesse político husi estrutura koligasaun sira enteriór.

JSMP mós haree katak ho mudansa política no lideransa iha PN, Parlamentu konsege hasa'e nia produtividade kompara ho tinan sira uluk iha 2019 ne'ebé nakonu ho turbulénsia política entre PN, Governu no Prezidente Repúblika. PN presiza kontinua mantein ho situasaun no produtividade ne'e ba tinan sira tuir mai, nune'e bele konsege diskute no aprova tan lei importante sira ne'ebé balun sei iha prosesu hela no balun seidauk tama iha ajenda.

3.2. Diskusaun no aprovasaun ba rezolusaun sira

Orden jurídika Timor-Leste nian adota prinsípiu sira direitu internasional jerál ka komún sira hanesan prevee iha provizaun pontu 1) Artigu 9 K-RDTL no tanba ne'e, Lei Internasional sira hanesan Tratadu, Konvensaun no Akordu sira sei vigora automatikamente iha orden jurídika Timor-Leste nian depoisde aprovasaun, ratifikasiada no publica iha Jornal Repúblika hanesan prevee iha Artigu 9 (2) K-RDTL.

Parlamentu Nasionál mak iha kompeténsia atu ratifica Lei Internasional sira ne'ebé Estadu Timor-Leste adota hanesan prevee iha provizaun alinea f) pontu 3) Artigu 95 K-RDTL no provizaun pontu 1) Artigu 131 Lei Nú. 15/2009 ne'ebé altera ho Lei Nú.1/2016 kona-ba Rejimentu Parlamentu Nasionál.

Ratifikasiada ne'e tenke liuhusi Rezolusaun Parlamentár hanesan prevee iha provizaun pontu 2) Artigu 133 Rejimentu Parlamentu ho votasaun globál iha Plenária tuir provizaun Artigu 132 Rejimentu Parlamentu no depoisde aprovasaun, haruka ba Prezidente Repúblika promulga tuir provizaun sira iha alinea a) Artigu 85 K-RDTL no pontu 1) Artigu 133 Rejimentu Parlamentu no publica iha Jornal Repúblika.

Bazeia ba provizaun pontu 1) Artigu 9 K-RDTL, iha tinan 2020, PN konsege aprova projeto rezolusaun ne'ebé pública ona iha Jornal Repúblika hamtuk 10.

Rezolusaun sira ne'e mak mak hanesan:

- 1) Rezolusaun Nú. 1/2020 kona-ba Kombate Alterasaun Klimátika³⁴.
- 2) Rezolusaun Nú. 2 /2020 kona-ba Adosaun Medida sira ba Prevensaun no Kombate Covid-19 no mós Medidas Rekuperasaun no Normalizasaun Ekonómika-Sosiál iha País, no Akompañamentu ho Ezekusaun Deklarasaun Estagdu Emerjénsia³⁵.
- 3) Rezolusaun Nú.3/2020 kona-ba Aprova Akordu Estabelesimentu Sede entre Repúblika Demokrática Timor-Leste ho g7+³⁶.
- 4) Rezolusaun Nú. 4 /2020 kona-ba Ratifika Carta husi g7+³⁷.
- 5) Rezolusaun Nú. 5/2020 kona-ba Aprova Konta Jerál Estadu ba 2018³⁸.
- 6) Rezolusuan Nú. 6/2020 kona-ba Aprova Orsamentu Parlamentu Nasional ba 2020³⁹.
- 7) Rezolusaun Nú. 7/2020 kona-ba Designasaun husi Parlamentu Nasional Membru ida ba Komisaun Funsaun Públíka⁴⁰.
- 8) Rezolusaun Nú. 8 /2020 kona-ba Autorizasaun Deklarasaun Estadu Emerjénsia⁴¹.
- 9) Rezolusaun Nú. 9/2020 kona-ba Aprova Orsamentu Parlamentu Nasional ba 2021⁴².
- 10) Rezolusaun Nú. 10/2020 kona-ba Rekomenda ba Governu Adosaun Medida sira ba Prevensaun Infantisídui no Abandona Bebé no Labarik⁴³.

JSMP observa katak rezolusaun sira ne'e importante duni maibé importante liu atu tau iha konsiderasaun mak kona-ba kapasidade no prontidaun Estadu Timor-Leste hodi implementa, liuliu mekanizmu internasional sira antes aprova. Ezemplu mak rezolusaun kona-ba kombate alterasaun klimatíka ne'ebé ne'ebé reafirma nia rekomendasaun ba Governu iha pontu a) kona-ba dezenvolve política ambiental ne'ebé bele kontribui ba esforsu global oinsá atu combate alterasaun klimatíka no mós pontu e) katak adota medida sira koncreta kona-ba política zero plastíka. Rekomendasaun sira husi mekanizmu internasional ne'e di'ak, maibé bainhira haree ba ita nia realidade, di'ak atu rezerva tiha lai no halo uluk preparasaun oinsa bele kria medida koncreta hodi realiza política zero plástika, se lae, Estadu labele implementa no karik implementa mós sei la la'o ho di'ak.

³⁴ Bele asesu iha website jornal da república: http://www.mj.gov.tl/jornal/public/docs/2020/serie_1/SERIE_1_NO_8.pdf

³⁵ Bele asesu iha website jornal da república: http://www.mj.gov.tl/jornal/public/docs/2020/serie_1/SERIE_1_NO_15.pdf

³⁶ Bele asesu iha website jornal da república: http://www.mj.gov.tl/jornal/public/docs/2020/serie_1/SERIE_1_NO_17.pdf

³⁷ Bele asesu iha website jornal da república: http://www.mj.gov.tl/jornal/public/docs/2020/serie_1/SERIE_1_NO_17.pdf

³⁸ Bele asesu iha website jornal da república:

http://www.mj.gov.tl/jornal/public/docs/2020/serie_1/SERIE_1_NO_24_B.pdf

³⁹ Bele asesu iha website jornal da república:

http://www.mj.gov.tl/jornal/public/docs/2020/serie_1/SERIE_1_NO_32.pdf

⁴⁰ Bele asesu iha website jornal da república: http://www.mj.gov.tl/jornal/public/docs/2020/serie_1/SERIE_1_NO_32.pdf

⁴¹ Bele asesu iha website jornal da república:

http://www.mj.gov.tl/jornal/public/docs/2020/serie_1/SERIE_1_NO_32_A.pdf

⁴² Bele asesu iha website jornal da república:

http://www.mj.gov.tl/jornal/public/docs/2020/serie_1/SERIE_1_NO_40.pdf

⁴³ Bele asesu iha website jornal da república:

http://www.mj.gov.tl/jornal/public/docs/2020/serie_1/SERIE_1_NO_51.pdf

IV. Komisaun Espesializada Permanente (KEP) sira

Parlamentu Nasionál atu asegura ezersísiu ba nia podér konstitusionál sira ho efetivu no eficiente, nesesariamente presiza harii KEP sira hodi trata asuntu espesífiku sira. Prosesu ne'e prevee iha Artigu 26 pontu 1) to'o 4), kompozisaun membru KEP sira-nian prevee iha Artigu 27 no kompeténsia sira prevee iha Artigu 35 Lei Nú. 15/2009 ne'ebé altera ho Lei Nú. 1/2016.

Membru KEP sira ne'e mai husi reprezentante bankada parlamentár sira, ho nia kompozisaun tuir medida reprezentasaun proporsionál husi bankada parlamentár sira. Bankada parlamentár ida la bele hatudu nia deputadu ida ba KEP liuhusi ida, ezetu bankada ne'ebé nia membru la to'o, maibé la bele reprenzenta liuhusi KEP rua hanesan prevee iha Artigu 27 (5) Lei Nú. 15/2009 ne'ebé altera ho Lei Nú. 1/2016.

Mandatu KEP sira ne'e sei la liu husi períodu lejizlatura ida nian. Ne'e signifika katak bainhira iha lejizlatura foun PN presiza harii fali KEP foun tuir nesesidade.

Iha Lejizlatura V nian PN estabelese KEP 7 ho nia área temátiku tuir ida-idak nia asuntu⁴⁴. KEP hirak-ne'e mak hanesan:

- 1) Komisaun A ne'ebé trata kona-ba asuntu Konstitusionál no Justisa ho nia membru hamutuk na'in 11;
- 2) Komisaun B ne'ebé trata kona-ba asuntu Negósiu Estranjeiru, Defeza no Seguransa ho nia membru hamutuk na'in 9;
- 3) Komisaun C ne'ebé trata kona-ba asuntu Finansa Pública ho nia membru hamutuk na'in 11;
- 4) Komisaun D ne'ebé trata kona-ba Asuntu Ekonómia no Dezenvolvimentu ho nia membru hamutuk na'in 10;
- 5) Komisaun E ne'ebé trata kona-ba Asuntu Infraestrutura ho nia membru hamutuk na'in 9;
- 6) Komisaun F ne'ebé trata kona-ba Asuntu Edukasaun, Saúde no Asuntu Sosiál ho nia membru hamutuk na'in 9;
- 7) Komisaun G ne'ebé trata kona-ba Asuntu Edukasaun, Sidadania, Juventude, Igualidade no Kultura ho nia membru hamutuk na'in 7.

Tuir observasaun JSMP nian no mós dadus husi Sekretariadu Tékniku PN (STPN) nian, iha 2020, KEP ne'ebé iha responsabilidade no pezu serbisu todan liu mak Komisaun A ne'ebé trata asuntu Konstitusional, Justisa, Administrasaun Pública, Podér Lokál no Lezislasaun. Komisaun ne'e konsege halo diskusaun no aprovisaun ba ezbosu lei importante sira hanesan Lei Medida sira prevensaun no Kombate korrupsaun, inklui halo apresiasaun ba pedidu sira kona-ba estensaun ba estadu emerjénsia, apresiasaun ba relatório sira kona-bá ezekusaun estadu emerjénsia, apresiasaun ba OJE 2020 no 2021 no mós halo audénsia público ba Lei Podér Lokál no Desentralizaun Administrativa no Lei Eleisaun Asembleia Munisipál.

Enkuantu Komisaun C ne'ebé hala'o knaar atu trata asuntu sira kona-ba Finansas Pública nian iha 2020 kontinua halo akompañamentu ba Polítika Orsamentu no Finansa Pública nian, halo apresiasaun ba OJE 2020 no 2021, ezekusaun Orsamentál Konta Jerál Estadu tinan 2018, apresia-

⁴⁴ Bele haree nia detallu iha ne'e: <https://www.parlamento.tl/cat/11>

proposta lei sira kona-ba levantamentu extra-ordinária ba fundu petróliu nian inklui mós realizasaun segundu levantamentu extra-ordinária ba fundu petróliu nian.

Haree pezu no produtividate serbisu husi komisaun rua ne'e nian, JSMP hanoin, importante atu Meza Parlamentu define tarefa sebisu sira husi Komisaun Espesializada Permanente sira seluk nian ne'ebé serbisu iha área lezislasaun nian hodi aumenta produtividate sira nian iha área ne'ebé sira tuteladu.

4.1. Atividade Fiskalizasaun

Atividade fiskalizasaun KEP sira nian ne'e nu'udar fiskalizasaun tékniku no serbisu tuir kompeténsia konstitusionál ne'ebé prevee iha Artigu 92 K-RDTL no iha termu serbisu tékniku prevee iha provizaun Artigu 35 Rejimentu Parlamentu kona-ba kompeténsia KEP sira nian.

KEP tuir provizaun ne'e, iha kompeténsia hodi:

- a) diskute no fó paraser kona-ba projetu lei, proposta lei, proposta alterasaun ba lei sira no mós Tratadu sira ne'ebé hatama ba PN.
- b) halo apresiasaun ba petisaun sira ne'ebé hato'o ba PN.
- c) inteira ka hatene tuir problema polítiku no administrativu ne'ebé tama iha ámbitu no hato'o paraser ba Parlamentu karik presiza bainhira sai hanesan elementu nesesáriu sira atu halo apresiasaun ba aktu sira Governu nian.
- d) halo audénsia pública ho entidade sira sosiedade sivil.
- e) konvoka kualkér titulár sira husi Administrasaun Pública hodi hato'o deklarasaun kona-ba asuntu sira liga ho sira-nia serbisu.

Iha tinan 2020, KEP sira konsege halo vizita fiskalizasaun barak iha munisípiu, postu administrativu, suku no instituisaun Estadu sira seluk. Númeru totál fiskalizasaun ne'ebé halo hamutuk 35⁴⁵. Entre relatório fiskalizasaun hirak ne'e, JSMP nota katak laiha *follow-up* ba nia efeitu ka implementasaun sira husi nia rekomendasaun hirak ne'ebé PN envia ba Governu no instituisaun relevante sira.

Nune'e, JSMP hanoin katak PN tenke muda mekanizmu hodi follow-up rekomendasaun sira husi relatório fiskalizasaun liuhusi medida rekerimentu ba Governu tuir provizaun alinea h) pontu 1) Artigu 9 Rejimentu Parlamentu atu obrigadu Governu no entidade Estadu nian tenke fó resposta ba preokupasaun deputadu sira nian ho prazu loron 30.

4.2. Komisaun A no Produtu Lejizlativu

Alende halo monitorizasaun regulár ba reuniaun plenária, JSMP mós halo monitorizaun regulár ba reuniaun Komisaun A nian. Iha 2020, JSMP konsege halo monitorizasaun ba reuniaun, audénsia pública no aprovasaun lei sira iha Komisaun A hamutuk 48 ne'e inklui ho reuniaun extra-ordinária Komisaun nian dala 5⁴⁶.

Komisaun A nu'udar KEP ne'ebé trata asuntu Konstitusionalidade, Justisa Administrasaun Pública, Podér Lokál no Lezislsau.

⁴⁵Bele asesu iha website Parlamentu Nasional: <https://www.parlamento.tl/node/1227?language=tl>

⁴⁶ Bele haree iha website Parlamentu Nasional : <https://www.parlamento.tl/node/412>

Durante monitorizasaun JSMP nian ba Komisaun, nota katak iha esbosu lei 4 mak Komisaun A konsege finaliza iha tinan 2020. Lei hirak ne'e mak hanesan Lei Medida sira Prevensaun no Kombate Korrupsaun, Lei Protesaun Sivíl no Lei Orsamentu Jerál 2020 no 2021 no Komisaun mós kosege finaliza lei importante ida iha inísiu tinan 2021 mak aprovasaun ba rejime juríku arbitrajen voluntáriu ne'ebé prosede alterasaun ba alterasaun primeiru ba Kodígu Prosesu Sivíl, prosede alterasaun ba alterasaun primeiru ba Kodígu Prosesu Sivíl inklui prosede alterasaun ba Lei Baze Organizasaun Administrasaus Pública.

Ezbosu lei sira ne'ebé sei iha faze audénsia público no disksuaun sira iha Komisaun A mak Lei Orden Advogadu, Lei Eleitorál ba Asembleia Munisipál, Lei Podér Lokál no Desentralizasaun Administrativa no Lei Organizasaun Judisiária, Estatutu Ministériu Público Lei, Lei Organizasaun Ordenasaun Administrasau Territorial, Lei kona-ba Estatutu Majistratura Judisiál no Lei Imigrasaun no Asíliu. Alende ezbosu lei sira ne'e, ezbosu lei kona-ba Estatutu Defensoria Pública nian, Parlamentu Nasional haruka fila fali tanba Defensoria Pública sei tutela ba iha Ministériu Justisa nia okos, nune'e, nia Estatutu kompete ba Governu mak halo liuhusi Dekretu Lei.

Bazeia ba rezultadu monitorizasaun JSMP nian nota katak esbosu lei hirak ne'e balun baixa ona ba Meza Komisaun nian, hafoin komisaun finaliza nia apresiasaun liuhusi audénsia público no balun sei hahú iha faze diskusaun no audénsia público hodi rona entidade relavante sira hanesan instituisaun ka Ministériu relevante sira husi Governu, autoridade lokál, autór sira instituisaun judisiáriu nian no sosiedade sivíl sira-nia opiniaun molok finaliza no haruka paraser ba PN hodi diskute no aprova.

Tuir JSMP nia observasaun, Komisaun A iha 2020 produtivu no efetivu tebes iha parte lejizlasaun nian. Komisaun A konsege aselera prosesu sira ba lei importante sira hanesan temi ona iha leten. Komisaun la'ós haree de'it ba lei sira, maibé haree mós ba asuntu relasiona ho petisaun no keixa sira husi komunidade no sosiedade sivíl.

Maski nune'e, JSMP kontinua rejista iregularidade barak iha serbisu Komisaun A nian, liuliu ligadu ho la pontuál no falta laiha justifikasiadaun ne'ebé dala barak implika ba adia ajenda diskusaun no aprovasaun ba relatório sira tanba kestaun kuórum. Ajenda sira ne'ebé hetan adiatamentu mak hanesan ajenda aprovasaun ba relatório vizita fiskalizasaun ba REOA-ZEEMS iha fulan Novembru 2019 no vizita fiskalizasaun ba munisípiu Covalima no Baukau ne'ebé hala'o iha fulan Dezembru 2019 adia nia apresiasaun no foin aprova iha loron 11 Marsu 2020.

Relasiona ho situasaun ida ne'e, JSMP rekomenda ba Meza Parlamentu no Prezidente Komisaun A atu hola medida dixiplinár tuir Rejimentu Parlamentu atu bele obriga deputadu sira hala'o sira-nia knaar tuir oras serbisu no la falta no karik falta tenke iha justifikasiadaun.

Iha parte lejizlasaun nian, mezmuke PN, partikularmente Komisaun A nia produtividade sa'e no funsiona ho efetivu, JSMP hanoin, importante atu PN estabelese Programa Lejizlasaun Nasional iha kada lejizlatura. Ida ne'e hanesan matadalan ida hodi orienta sira-nia serbisu sira, liuliu ba asuntu sira ne'ebé tama iha kompeténsia eskluzivu Parlamentu nian. Estabelesimentu programa ida ne'e bele kore dependénsia Parlamentu nian ba proposta lei no iniciativa sira husi Governu.

Iha realidade, PN presiza dezenvolve lei barak atu bele asegura konkretizasaun ba norma konstitusionál pragmáтика sira ne'ebé konsagra iha Konstituisaun. Falta medida lejizlativu ba

konkretizasaun norma konstitusionál sira ne'e, Alende difikulta ezekusaun plena ba Konstituisaun, kria mós kondisaun ba interpretasaun ne'ebé fragmentadu husi parte oinoin ne'ebé ikus mai hamosu konfuzsaun ba pública no mós órgaun konstitusionál sira iha ezerse sira-nia podér no kompeténsia. Nune'e, PN presiza kria Programa Nasional Lejizlasaun ida hodi bele identifika no inklui iha planu lejizlasaun iha kada sesaun lejizlativa medida lejizlativa nesesáriu sira ba konkretizasaun norma konstitusionál sira.

4.3. Serbisu hamutuk entre Komisaun A ho JSMP

JSMP apresia aas tebes ba serbisu no kolaborasaun di'ak Komisaun A ho JSMP durante ne'e. Parlamentu Nasional durante ne'e liuhusi Komisaun A sempre envolve JSMP iha audénsia pública sira hodi rona hanoin sira JSMP nian ligadu ho esbosu lei sira ne'ebé Parlamentu no Governu loke diskusaun no audénsia pública. Alende, Komisaun A mós konvida no envolve JSMP iha diskusaun sira ba ezbosu lei sira hodi kontribui hanoin ba dezenvolve lei sira ne'e.

Iha prosesu lejizlativu nian, Komisaun A sempre konsidera hanoin sira JSMP nian hato'o liuhusi paraser sira, partikularmente esbosu Lei Anti Korrupsaun, hodi inklui artigu balun iha projetu lei ne'e no iha relatório paraser Komisaun nian ba iha plenária. Paraser ne'e nu'udar meu ideal ba JSMP hodi kontinua hala'o nia serbisu iha área justisa, direitu umanu no lei sira.⁴⁷

JSMP mós hato'o nia apresiasaun ba progresu ne'ebé Komisaun A halo durante tinan 2020 hodi fó prioridade ba esbosu lei importante sira ne'e no tau iha calendáriu planu serbisu Komisaun nian. Komisaun A kontinua nakloke an ba komunidade sira no sosiedade sivil atu hato'o sira nia preokupsaun relasiona ho asuntu sira ne'ebé Komisaun tutela ba⁴⁸.

JSMP haree katak karatér PN no partikularmente Komisaun A ne'ebé promove no tane aas tebes partisipasaun pública nian iha prosesu lejizlasaun nian hodi rona hanoin no perspetiva pública nian iha jerál no sosiedade sivil iha partikulár refleta duni natureza PN nu'udar órgaun estadu ne'ebé reprezenta povu tomak.

Relaciona ho atividade audénsia pública Komisaun nian, liuliu iha munisípiu sira, JSMP rekomenda ba Komisaun atu hadi'a mekanizmu audénsia ne'e liuhusi prepara sumáriu eskrita ba kestaun sira ne'ebé presiza halo diskusaun iha lian Tetun no distribui tiha antes nune'e bele fasilita ho di'ak partisipante sira-nia partisipasaun iha diskusaun. Nune'e, audénsia ne'e bele sai efetivu ka iha rezultadu ne'ebé di'ak liu hodi kontribui ba prodús lei ne'ebé refleta realidade, interesse no aspirasaun ema barak nian.

Alende mekanizmu ne'ebé JSMP mensiona iha leten bele mós rona ema interesadu sira liuhusi mídia website Parlamentu Nasional nian atu bele envolve ema barak iha konsultasaun pública sira iha prosesu lezislasaun nian.

⁴⁷ Bele haree iha website JSMP: <http://jsmp.tl/wp-content/uploads/PRKomisaun-A-PN-konsidera-rekomendasau-JSMP-balun-ih-a-Projetu-Lei-Anti-Korrupsaun.pdf>

⁴⁸ Bele haree iha website JSMP <https://jsmp.tl/wp-content/uploads/JSMP-apresia-inisiativa-Komisaun-A-neebe-prepara-ona-kalendariu-serbisu-Komisaun-nian-ba-fulan-6-ih-a-tinan-2021-Janeiru-2021.pdf>

V. Observasaun Polítika no Analiza Lejizlativu

Iha parte ida-ne'e, JSMP apresenta nia observasaun krítica ba situasaun ka kestaun política no lejizlativa sira iha rai laran iha jerál no partikularmente iha Parlamentu Nasionál ne'ebé hamosu impaktu boot ba interesse povu no NASAUN nian.

Kestaun política no lejizlativa ne'ebé JSMP koloka, halo peskiza no analiza iha tinan 2020 no relata iha relatóriou ne'e no mós iha dokumentu relevante sira seluk mak hanesan:

- 1) Mekanizmu hodi garante Konstituisaun no Impeachment ba Prezidente Repúblika;
- 2) Pandemia Covid-19 no implementasaun Estadu Emerjénsia;
- 3) Destituisaun ba Estrutura Meza Parlamentu;
- 4) Lei Nú. 10/2020 kona-ba Orsamentu Jerál Estadu (OJE) 2020
- 5) Lei Nú. 14/2020 kona-ba Orsamentu Jerál 2021
- 6) Lei Nú. 7/2020 kona-ba Medida sira ba Prevensaun no Kombate Korrupsaun
- 7) Alterasaun ba Artigu 1475 Kódigu Sivíl Timor-Leste kona-ba Kazamento

5.1. Mekanizmu hodi garante Konstituisaun no *Impeachment* ba Prezidente Repúblika⁴⁹

Relaciona ho interpretasaun ba K-RDTL, desde Konstituisaun ne'e tama iha vigór iha 2002 to'o ohin loron, mosu konfuzau iha público tanba versaun interpretasaun ne'ebé oioin husi público.

Konfuzau sira ne'e mós durante ne'e, dala barak hatudu katak órgaun no titulár sira ne'ebé K-RDTL atribui kompeténsia, koko no halo esforsu hodi ezerse kompeténsia konstitusionál sira ne'e, maibé la tuir nia dalan ne'ebé loos no própriu.

Ezemplu konkretu mak petisaun ne'ebé deputadu sira husi Bankada CNRT hato'o ba TR ne'ebé ezerse kompeténsia STJ hodi halo fiskalizasaun abstrata ba aktu sira Prezidente Repúblika nian ne'ebé konsidera halo violasaun klara no grave ba nia obrigasaun konstitusionál sira. Petisaun ne'e, liuhusi TR nia akordaun indefere tanba nia mekanizmu la loos. Ezemplu seluk mak rekerimentu husi eis Prezidente Parlamentu Nasionál distintu deputadu Arão Noe do Amaral ne'ebé hato'o rekerimentu ba STJ/TR hodi husu fiskalizasaun abstrata ba reuniaun plenaria iha PN hodi halo destituisaun ba nia kargu. Rekerimentu ne'e mós STJ/TR indefere tanba konsidera aktu destituisaun ne'e aktu político ne'ebé la kompete ba TR hodi fiskaliza.

Refleta ba referénsia husi kazu koncreta hirak-ne'e, JSMP iha 2020 koko halo peskiza no analiza hodi buka no kontribui solusaun ba konfuzau sira ne'e. Nune'e, JSMP liuhusi relatóriou temátiku ida tenta deskreve nia rezultadu peskiza, analiza no interpretasaun ba provizaun relevante sira K-RDTL nian, partikularmente kona-ba garantia K-RDTL ne'ebé prevee iha Parte VI, Título I kona-ba Garantia ba Konstituisaun, Artigu 48 K-RDTL kona-ba direitu sidadaun nian hodi halo defeza mós Konstituisaun no mós kona-ba oinsa bele kontrolu ba kumprimentu obrigasaun konstitusionál Prezidente Repúblika nian tuir provizaun Artigu 79 K-RDTL.

Iha peskiza no analiza ne'e, JSMP hahú ho referénsia teoria no metodolojia *hermenéutica* Konstituisaun ka interpretasaun ba Konstituisaun ne'ebé JSMP konsidera importante ba parte relevante sira atu hatene bainhira halo interpretasaun ba Konstituisaun.

⁴⁹ Resultadu peskiza, analiza no interpretasaun ne'e, JSMP prodús iha relatóriou ketak ida ne'ebé lansa hamutuk ho relatóriou ida ne'e "Mekanizmu ba Garante Konstituisaun no Impeachment ba Prezidente Repúblika": <https://jsmp.tl/wp-content/uploads/Relatorio-tematica-mekanizmu-garante-Konstituisaun-no-Impeachment-ba-PR.pdf>

Enkuantu medida ka mekanizmu próprio no adekuadu ba garantia Konstituisaun no asegura kumprimentu ba obrigasaun konstitutionál Prezidente Repúblika nian, JSMP foti referénsia husi Portugal no Brazil ne'ebé adota sistema sivilista hanesan Timor-Leste.

Iha parte ikus, JSMP hato'o rekomendasau ba órgaun no titulár kompetente relevante sira, inklui públiku iha jerál ne'ebé Konstituisaun garante direitu ba defeza no garante kumprimentu ba Konstituisaun atu bele tau iha konsiderasaun hodi bele ezerse ho plena no efetivu kompeténsia no direitu sira ne'e. Nune'e, bele asegura implementasaun ida ne'ebé di'ak, loos, efetivu no másimu ba norma konstitutionál sira.

5.2. Estadu Emerjénsia no nia impaktu sosio-ekonómiku no direitu umanu

Deklarasaun Estadu Emerjénsia (EE) nu'udar rezultadu husi asaun Governu Timor-Leste hodi hatan ba pandemia Covid-19 mosu iha Xina, iha 01 Dezembru 2019. Pandemia ne'e tama iha Timor-Leste iha 11 Marsu 2020. Informasaun ne'e formalmente fó-sai husi Organizaun Mundial Saúde (OMS) liuhusi komunikadu hodi deklara katak Covid-19 hanesan pandemia ida ne'ebé afeita no ameasa ba ema barak nia moris iha mundu, inklui Timor-Leste⁵⁰.

Estadu Timor-Leste liuhusi PN iha 26 Marsu 2020 halo reuniaun plenaria extraordináriu hodi halo apresiasaun ba pedidu deklarasau EE ne'ebé submete husi Konsellu Ministru iha 25 Marsu 2020. Iha loron tuir mai, iha 27 Marsu 2020, Prezidente Repúblika fó sai dekretu Prezidente Repúblika hodi deklara EE hahú husi 28 Marsu to'o 26 Abril 2020⁵¹.

Deklarasaun EE ne'e nia objetivu mak atu halo limitasaun ba direitu fundamental balun sidadaun sira-nian hanesan liberdade sirkulasaun no reuniaun ne'ebé konsagra iha provizaun Artigu 42 no 44 K-RDTL. Ida ne'e, nu'udar parte ida atu halo prevensaun no kombate Covid-19. Covid-19 ne'e nia propagasaun (daet) lais tebes hodi hamate ona ema lubun ida iha mundu no ne'e lori impaktu ne'ebé boot ba iha ekonómia globál.

Iha implementasaun EE maski sei hasoru dezafiu oinoin no ho limitasaun iha termu rekursu umanu no ekipamentu ka facilidade sira ba ekipa médiку sira (*frontline*) sira maibé Estadu nafatin halo esforsu sira hodi estabelese no instala fatin izolamentu no kuarantina hodi bele atende suspeitu sira husi Covid-19.

JSMP apresia no agradese ba governu maski ho limitasaun oin-oin maibé nafatin halo enumerasaun ba medida sira husi ezekusaun deklarasau EE tanba medida sira ne'e ho objetivu atu prevene pandemia Covid-19, salva ema nia vida, maski medida sira ne'e limita liberdade no direitu fundamental balun.

JSMP mós deskobre katak durante implementasaun EE ba prevensaun no kombate Covid-19 ne'e lori mós impaktu ba direitu umanu, sosiál, política no ekonómiku. Maski EE ne'e, aplika ba

⁵⁰ Detallu husi komunikadu ne'e bele haree iha ne'e: https://www.who.int/docs/default-source/coronavirus/transcripts/who-audio-emergencies-coronavirus-press-conference-full-and-final-11mar2020.pdf?sfvrsn=cb432bb3_2

⁵¹ Detallu husi Dekretu Prezidente Repúblika bele haree:
http://www.mj.gov.tl/jornal/public/docs/2020/serie_1/SERIE_1_NO_13_A.pdf

medida sira ne'ebé rigór liu no bele implika ba limitasaun nune'e mós suspende ema nia direitu sira, liberdade no movimentu no mós implika ba direitu fundamental sira seluk, maibé Estadu iha objetivu no interesse ida ne'ebé boot liu atu salva povu sira husi pandemia Covid-19 ne'e.

5.3. Destituisaun Estrutura Meza Parlamentu Parlamentu

Destituisaun ba lideransa ka estrutura Meza Parlamentu Nasional halo liuhusi diskusaun no votasaun iha plenaria Parlamentu iha 19 Maiu 2020. Prosesu destituisaun ba Prezidente Parlamentu prevee iha provizaun Artigu 16 B no ba membru Meza Parlamentu prevee iha provizaun Artigu 20 B Rejimento Parlamentu.

Prosesu destituisaun ba Prezidente Parlamentu nian tuir provizaun Artigu 16 B mak tenke hahú ho pedidu rekerimentu ho mínimu deputadu na'in sanulu husi deputadu sira efetivu iha funsaun no nia ajenda ba votasaun tenke hala'o iha plenaria iha loron ne'ebé labele liu husi loron lima. Votasaun ba destituisaun ne'e hala'o ho sekretu no rekere prezensa deputadu sira-nian liuhusi sorin balu ka metade husi deputadu sira ne'ebé efetivu iha funsaun. Destituisaun ne'e tenke aprova ho maioria absoluta husi deputadu sira ne'ebé marka prezensa. Iha parte prosesu destituisaun ba membru Meza Parlamentu nian tuir provizaun Artigu 20 B Rejimento Parlamentu nian, kuaze hanesan ho Prezidente Parlamentu nian, nia diferenca iha pedidu rekerimentu ba destituisaun mak ejize mínimu deputadu na'in ualu.

Tuir JSMP nia observasaun, iha razaun prinsipál rua ba halo destituisaun estrutura Meza Parlamentu nian ne'e. Razaun dahuluk mak partidu político CNRT sai ona husi Governu koligasaun lideradu husi Primeiru Ministru Taur Matan Ruak no partidu FRETILIN mak viabiliza governasaun ne'e. Razaun daruak mak Prezidente Parlamentu Nasional iha altura, distintu deputadu Arão Noe Amaral la prezide reuniaun plenaria mezmuke nia marka hela prezensa iha Parlamentu Nasional.

Diskusaun ba destituisaun estrutura Meza Parlamentu nian ne'e hahú kendas iha 18 Maiu 2020. Iha reuniaun plenaria iha 18 no 19 Maiu 2020 mosu disturbui iha salaun plenária Parlamentu Nasional (PN) entre deputadu sira, bainhira Vise-prezidente Parlamentu Nasional na'in rua, distinctu deputada Maria Angelina Lopes Sarmento ho distinctu deputadu Luis Roberto da Silva tenta atu okupa fatin Prezidente Parlamentu Nasional nian iha Meja Prezidénsia Parlamentu nian.

JSMP halo monitorizasaun reuniaun plenaria sira ne'e hodi hakerek kendas komunikadu imprensa ida iha 19 Maiu 2020 hodi hato'o lamentasaun ba aktu deputadu sira-nian iha plenaria Parlamentu Nasional. Iha komunikadu ne'e, JSMP husu ba deputadu sira atu kontinua hatudu komportamentu político ho étika ba público nu'udár reprezentante povu hodi kumpri lei sira no rejimento Parlamentu Nasional atu bele rezolve dezentendimentu sira entre deputadu sira ligadu ho pedidu destituisaun nian⁵². Aktu sira hanesan ne'e viola ona provizaun pontu 2) Artigu 10 Rejimento Parlamentu nian kona-ba devér deputadu sira nian.

JSMP rekoñese mós katak pedidu destituisaun tuir dalan rejimentál ne'ebé regula ona iha Artigu 16-B, maibé importante mak tenke tuir prosedimentu sira ne'ebé regula iha Rejimento hodi facilita prosesu destituisaun no evita hamosu dezentendimentu no obriga realiza reuniaun

⁵² Detallu husi komunikadu imprensa ne'e bele haree iha: https://jsmp.tl/wp-content/uploads/PrJSMPLamentahoPN_TETUM.pdf

plenaria hodi halo diskusaun no votasaun ba destituisaun Prezidente Parlamentu. Prosesu diskusaun no votasaun ne'e rasik la tuir ona prosedimentu sira ne'ebé prevee iha Rejimentu Parlamentu nian.

5.4. Lei Nú. 10/2020 kona-ba Orsamentu Jerál Estadu (OJE) 2020

Orsamentu Jerál Estadu (OJE) ne'e regula iha provizaun Artigu 145 K-RDTL, Lei Nú. 13/2009 kona-ba Orsamentu no Jestaun Finanseira no provizaun Artigu 162 to'o 170 Lei Nú. 15/2009 ne'ebé altera ho Lei Nú. 1/2016 kona-ba Rejimentu Parlamentu. Nune'e, prosesu ba OJE tenke kumpri regra legal sira ne'e.

Prosesu aprezentasaun ba OJE iha Parlamentu Nasional tuir provizaun pontu 1) Artigu 30 Lei Nu. 13/2009 no provizaun Artigu 162 Lei Nu. 15/2009 ne'ebé altera ho Lei Nu. 1/2016 hahú 15 Outubru antes tinan fiskál hahú no nia tempu másimu ba aprovasaun OJE mak loran 60 hanesan prevee iha alinea f) Artigu 86 K-RDTL.

Proposta OJE 2020 nian hahú tama iha Parlamentu Nasional iha 15 Outubru 2019 no nia prosesu iha Parlamentu tuir prosedimentu sira ne'ebé prevee iha provizaun sira Rejimentu Parlamentu Nasional. Mezmu nune'e, debate OJE ne'e to'o de'it iha jeneralidade durante loran 3 iha ne'ebé Governu dada ka retira Proposta Lei OJE 2020 iha 3 Dezembru 2019⁵³. Governu retira Proposta Lei ne'e bazeia ba provizaun pontu 2) Artigu 95 Rejimentu Parlamentu nian katak bainhira admite tiha ona projeto ka proposta lei ka alterasaun ruma, autór sira bele dada ka retira iha votasaun jeneralidade.

Depoisde retira tiha, Governu halo revizaun ba orsamentu ne'e no Konsellu Ministru aprova hodi haruka fali ba Parlamentu Nasional iha 19 Dezembru 2019 ho pedidu konsiderasaun urjénsia ba Komisaun C ne'ebe tutela ba Finansa Publiqua⁵⁴. Komisaun C iha 23 Dezembru 2019, aprezenta karta pedidu aprovasaun ba Prezidente Parlamentu kona-ba pedidu urjensia Proposta Lei Nu. 9/V (2^a) kona-ba OJE 2020⁵⁵. Komisaun C iha karta ne'e no tuir Rejimentu Parlamentu nian, propoin loran másimu ba halo audénsia, hakerek paraser no halo redasaun finál hamutuk loran 24.

Bainhira Komisaun C halo tiha audénsia ho Governu, iha 15 Janeiru 2020, aprezenta paraser ba iha Plenaria PN hodi hahú diskute no aprova iha jeneralidade⁵⁶. Debate ba proposta OJE 2020 daruak iha jeneralidade ne'e nafatin tuir prosedimentu normál loran 3. Iha 17 Janeiru 2020, PN rejeita proposta orsamentu ne'e, nune'e, OJE 2020 xumba⁵⁷.

JSMP nia parte, bainhira PN la aprova OJE 2020, koko kontribui ba buka solusaun alternativa ba situasaun ne'e liuhusi prodús paraser ida hodi dirije ba Prezidente Repùblika nu'udar órgaun

⁵³ Bele haree informasaun kona-ba asuntu ne'e iha ne'e: <https://www.parlamento.tl/node/1316?language=pt-pt>

⁵⁴ Komunikadu imprensa Konsellu Ministru nian iha ne'e:

<https://www.laohamutuk.org/econ/OGE20/second/GotlCOM19Dec2019te.pdf>

⁵⁵ Detallu kona-ba ajenda Komisaun C nian bele haree iha ne'e:

<https://www.laohamutuk.org/econ/OGE20/second/PNCommCReportUrgencyOJE2020-23Dec2019.pdf>

⁵⁶ Detallu kona-ba paraser Komisaun C nian iha ne'e:

<https://www.laohamutuk.org/econ/OGE20/second/PNparacerOJE2020-14Jan2020pt.pdf>

⁵⁷ Detallu Komunikadu Imprensa PN nian kona-ba OJE 2020 la aprova iha ne'e:

<https://www.laohamutuk.org/econ/OGE20/second/PN17Jan2020te.pdf>

Estadu ne'ebé iha kompeténsia konstitusionál hodi solusiona situasaun ne'e⁵⁸. JSMP halo analiza no interpretasaun ba Konstituisaun no lei relevante sira hodi apresenta mós solusaun alternativa sira ba Prezidente Repúblika.

Tuir JSMP nia analiza no interpretasaun, prosesu lejislasaun ne'ebé liga ho OJE labele aplika prosesu lejislasaun komún hanesan aplika ba lei sira seluk. Razaun JSMP nian ne'e bazeia ba K-RDTL, Lei Orsamentu no Jestaun no mós Rejimentu Parlamentu Nasional nian. Tuir provizaun pontu 1) Artigu 3 Lei Nú. 13/2009 ne'ebé altera ho Lei Nú. 9/2011 no Lei Nú. 3/2013 kona-ba Orsamentu no Jestaun Finanseira katak orsamentu estadu ne'e anuál no iha nia provizaun pontu 6) Artigu 3 ne'e prevee katak tinan finanseiru ne'e koninside ka halai hanesan ho tinan sivil ne'ebé hahú husi 1 Janeiru to'o 31 Dezembru.

Nune'e, atu asegura prosesu lejislasaun ba orsamentu ne'e la'o tuir períodu normál tinan finanseira nian, lei regula ketak nia prosesu ne'e husi prosesu lejislasaun komún sira. Iha prosesu lejislasaun komún laiha terminasaun tempu iha kada faze prosesu hanesan prevee iha provizaun Artigu 162 to'o 169 Rejimentu Parlamentu nian kona-ba prosesu lejislasaun OJE nian. Tuir provizaun sira ne'e, tempu sira ba iha prosesu iha Komisaun Espesializada Permanente sira hamutuk loron 35 no tempu sira ba iha prosesu diskusaun no aprovasaun iha plenaria hamutuk loron 13 no inklui tempu ba redasaun finál maizumenus loron 50. Alende lei termina espesifikamente limitasaun tempu ba iha prosesu lejislasaun nian, provizaun alinea f) Artigu 86 K-RDTL mós dermina iha prinsípiu limitasaun tempu másimu ba aprovasaun OJE mak loron 60.

Nune'e, iha prosesu lejislasaun ba Lei OJE ne'e sei la sujeita ba prosesu pendente no mós kaduka, inklui partikularmente retira hanesan lei sira seluk tanba tenke kumpri limitasaun tempu ne'ebé iha. Tanba ne'e, Lei OJE ne'e sujeita de'it ba konsekuénsia política ba Governu no PN bainhira liu ona períodu loron 60 nian laran seidauk iha aprovasaun ba OJE hanesan prevee iha alinea f) pontu 1) Artigu 86 K-RDTL no bainhira OJE ne'e rejeita ka la aprova dala rua tuituir malu iha Parlamentu Nasional hanesan prevee iha provizaun alinea g) pontu 1) Artigu 86 no alinea d) pontu 1) Artigu 112 K-RDTL.

Prazu tempu ka restrisaun tempu ne'e sei la aplika ba situasaun Governu demitudu hela, sei halo hela tomada pose ba Governu foun no bainhira termu lejislatura hotu ka termina hanesan prevee iha provizaun pontu 2) Artigu 30 Lei Orsamentu no Jestaun Finanseira. Bainhira Governu tama iha situasaun hanesan ne'e signifika katak sei laiha OJE iha loron 60 nia laran tuir prosesu normál nian. Nune'e, atu asegura ezkusaun OJE tuir tinan fiskál, lei loke dalan atu Governu bele uza orsamentu ho rejime duodesimál hanesan prevee iha provizaun Artigu 31 Lei Orsamentu no Jestaun Finanseira ho Lei OJE tinan ida uluk nian. Rejime duodesimál ne'e sei la aplika ba situasaun ne'ebé Governu funsiona normál hela no la'o tuir hela prosesu normál OJE nian.

Bazeia ba fundamento konstitutionál no legál sira ne'ebé temi ona iha leten, JSMP hanoin, Governu Konstitutionál VIII tuir lolos labele retira Proposta Lei OJE 2020 nian tanba kestaun limitasaun tempu nune'e mós tanba laiha provizaun legál ne'ebé regula kona-ba prosesu OJE ne'e retira hanesan prosesu lejislasaun komún nian ne'ebé prevee iha provizaun pontu 2) Artigu

⁵⁸ Detallu husi JSMP nia paraser bele haree iha ne'e: https://jsmp.tl/wp-content/uploads/Paraser-kona-ba-OJE-2020-ba-Prezidente-Republika_TETUM.pdf

95 Rejimentu Parlamentu. Prosesu lejislasaun komún laiha problema atu retira tanba laiha tempu ne’ebé kesi ka limita.

Mezmuke se lei loke dalan ba prosesu retira iha OJE, tuir JSMP nia hanoin, sei loke dalan ka leet ba kualkér partidu ka koligasaun partidaria atu desvia husi prosesu sira ne’ebé prevee iha provizaun alinea f) no g) pontu 1) Artigu 86 K-RDTL no provizaun alinea d) pontu 1) Artigu 112 K-RDTL. Bainhira situaun ne’e akontese mak sei fó impaktu ba estabilidade política ne’ebé bele dura tempu naruk hanesan Timor-Leste hasoru desde eleisaun jerál 2017 to’o ohin loron, tanba laiha solusaun política ida ne’ebé próprio no definitiva tuir Konstituisaun no lei sira.

Alende ne’e, tuir JSMP nia observasaun no analiza, utilizasaun orsamentu ho rejime duodesimál ne’e, lei loke dalan ba Governu ne’ebé tama iha situaun sira ne’ebé prevee iha provizaun sira Artigu 31 Lei Orsamentu no Jestaun Finanseira. Ida ne’e tanba prosesu ba OJE sei la tuir ona tempu ne’ebé prevee ka determina no sei bele akontese katak sei laiha OJE iha inísiu tinan finanseira, nune’e, Governu bele rekorre ba orsamentu temporáriu hodi sustenta administrasaun Estadu. Iha kontráriu, Governu ne’ebé la tama iha situaun sira ne’e no nia prosesu orsamentu la’o normál hela, sei laiha dalan atu uza orsamentu ne’e. Governu ne’e hakarak ka lakohi tenke hasoru sansaun política ne’ebé prevee iha provizaun sira alinea f) no f) pontu 1) Artigu 86 K-RDTL no provizaun alinea d) ponatu 1) Artigu 112 K-RDTL bainhira Parlamentu Nasional la fó votu konfiansa ka rejeita programa Governu dala rua tutuir malu no bainhira liu ona loron 60 Parlamentu Nasional la aprova OJE.

Iha kontestu Timor-Leste nian, akontese ona ho Governu Konstitusionál VII no VIII ne’ebé uza orsamentu estadu ho rejime duodesimál sein tama iha situaun ezesonál sira ne’ebé iha provizaun Artigu 31 Lei Orsamentu no Jestaun Finanseira. Situaun ida ne’e mosu tanba partidu político sira, tuir observasaun JSMP nian, aproveita lakuna sira ne’ebé eziste iha K-RDTL. Iha provizaun alinea g) pontu 1) Artigu 86 no provizaun alinea d) pontu 1) Artigu 112 K-RDTL prevee de’it katak bele demite Governu bainhira Parlamentu Nasional la aprova nia programa dala rua tutuir malu, la prevee mós katak bainhira la apresenta tan nia programa ba dala rua. Nune’e, partidu ka koligasaun partidu político sira ne’ebé harii Governu sei laiha dalan atu desvia ka halai ses husi sansaun política demisaun Governu. Se lae Governu bele desvia ka halai ses husi sansaun ne’e ho la apresenta tan ba dala rua programa Governu hanesan akontese ho Governu Konstitusionál VII nian.

Situasaun ne’e sai komplikadu liutan iha prosesu OJE 2020 nian lideradu husi Governu Konstitusionál VIII. Prosesu OJE ne’e iha inísiu hahú ho loos tuir lei, maibé ikus mai halai ses tiha husi regra sira ba prosesu OJE nian hodi aplika fali prosesu sira prosesu lejislasaun komún nian hanesan “retira” proposta ka projetu lei ne’ebé la kesi ho tempu, maibé depende de’it ba vontade político husi partidu político iha asentu parlamentár. Prosesu OJE nian ne’e hakarak ka lakohi tenke hasoru situaun entre aprova orsamentu no la aprova no bainhira la aprova tenke simu ona sansaun político ne’ebé iha provizaun alinea f) pontu 1) Artigu 86 K-RDTL bainhira rezultadu konsultasaun Prezidente República nian ho Konsellu Estadu afavór ba disolusaun Parlamentu.

Nune’e, JSMP hanoin, importante ba partidu político ne’ebé iha asentu parlamentár, partikularmente sira ne’ebé hetan konfiansa povu nian ho maioria parlamentár hodi forma

Governu no kaer ukun, atu bele tau interese nacionál aas liu hotu no evita krize política ne'ebé dura tempu naruk ho kumpri rekizitu no prosedimentu konstitusionál no legál sira relasiona ho prosesu programa no OJE. Ida ne'e nu'udar dalan úniku tane aas ka dignifika Estadu-Direitu Demokrátiku.

5.5. Lei Nú. 14/2020 kona-ba Orsamentu Jerál 2021

Parlamentu Nasionál, liuhusi reunuan plenária PN hahú husi loron 10 to'o 12 Dezembru 2020 aprova ona Proposta Lei Nú.23/V(3a) kona-ba Orsamentu Jerál Estadu (OJE) ba tinan 2021 hodi sai Lei Nú. 14/2020 kona-ba Orsamentu Jerál Estadu 2021⁵⁹ ho votu afavór 44, kontra 0 no abstain 0. Montante totál OJE 2021 ne'ebé aprova ne'e hamutuk billiaun US\$1,895,000,000.00. Totál orsamentu ne'e inklui ho orsamentu impréstimu no doasaun husi parseiru dezenvolvimentu sira.

5.5.1. Estrutura orsamentu

Orsamentu tinan 2021 ne'e ho estrutura orsamentu foun. Formatu orsamentu ne'e bazeia ba programa ne'ebé kompostu husi livru 9 mak hanesan livru 1 kona-ba panorama orsamentál, livru 2 kona-ba planua anuál sira, livru 3A kona-ba fundu sira infrestrutura, livru 3B kona-ba orsamentu munisipál, livru 3C kona-bá orsamentu REOA-ZEEMS, livru 4AB kona-bá rúbrika orsamentál, livru 5 kona-bá parseiru dezenvolvimentu no livru 6 kona-bá fundu espesiál-FDCH.

Tuir JSMP nian observasaun no analiza, estrutura OJE nian regula ona iha Lei Orsamentu no Jestaun Finanseira. Provizaun Artigu 29 Lei Orsamentu no Jestaun Finanseira prevee katak Proposta Lei OJE nian tenke konstitui estrutura no konteúdo formál ne'ebé idéntiku ho Lei Orsamentu nian. Iha provizaun Artigu 24 Lei Orsamentu no Jestaun Finanseira kona-ba konteúdo formál no estrutura OJE nian prevee katak Lei OJE nian kontein artikuladu no tabela orsamentál ne'ebé aprova iha aneksu no provizaun alinea b) Artigu 28 kona-ba tabela orsamentál prevee de'it kona-ba dotasaun OJE, la prevee kona-ba programa idaidak ka atividade ketaketak hanesan estrutura OJE 2021.

Nune'e, JSMP hanoin, bainhira Governu apresenta OJE ba PN ho estrutura ne'ebé foun la ho halo alterasaun ba Lei Orsamentu no Jestaun Finanseira, estrutura OJE ne'ebé konsideradu ilegal tanba la tuir lei ka kontráriu ho lei ne'ebé vigora. Tanba ne'e, atu asegura respeitu ba Estadu-Direitu Demokrátika katak buat hotu tenke tuir Konstituisaun no lei, JSMP sujere atu PN halo alterasaun uluk ba Lei Orsamentu no Jestaun Finanseira molok adota estrutura foun OJE nian ne'e.

5.5.2. Polítika jéneru

Iho OJE 2021, Governu inklui orsamentu ba implementasaun política jenéru iha programa Governu nian no ida ne'e konsidera hanesan pasu importante ida ba NASAUN atu kumpri nia obrigasaun sira nu'udar NASAUN membru ne'ebé ratifika ona Konvensaun Internasional kona-ba Eleminasaun Diskriminasaun Hasoru Feto (CEDAW)⁶⁰. Nune'e mós hanesan meu ida atu promove no elimina aktu diskriminasaun sira kontra feto iha instituisaun públiku no privadu sira, inklui sosiedade Timor-Leste iha jerál. Relasiona ho kestaun ne'e, JSMP nia parte apresia tebes

⁵⁹ Bele asesu iham jornal da republika: http://www.mj.gov.tl/jornal/public/docs/2020/serie_1/SERIE_1_NO_52A.pdf

⁶⁰ Bele asesu iha website JSMP: https://jsmp.tl/wp-content/uploads/PrOJEbaPolítikaPolítikaJENERU_TETUM.pdf

Governu no mós Parlamentu Nasional hodi bele aloka no aprova orsamentu ba implementasaun políтика jéneru⁶¹.

Instituisaun Estadu 14 ne’ebé aloka orsamentu ba programa implementasaun ba políтика jenéru kompostu husi PN US\$77,000.00, Sekretáriu Estadu ba Igualidade no Inklusaun ho totál orsamentu US\$2,554,000.00, Sekretariu Estadu Formasaun Profisionál no Empregu ho totál orsamentu US\$15,000.00, Ministériu Justisa US\$3,000.00, Ministériu Administrasaun Estatal US\$50,000.00, Ministériu Saúde US\$9,000.00, Ministériu Solidaridade Sosiál no Inklusaun US\$427,000.00, Ministériu Planu no Ordenamento ho totál orsamentu US\$15,000.00, Ministériu Transporte no Komunikasaun ho totál orsamentu US\$10,000.00, Ministériu Defesa US\$73,000.00 (saláriu vensimentu no bens serbisu), FALINTIL-F-FDTL US\$20,000.00, Ministériu Interiór US\$23,000.00, PNTL US\$103,000.00 (bens serbisu no kapítal minór no Universidade Nasional US\$89,000.00. Nune’e, totál orsamentu ba Programa implementasaun políтика jenéru hamutuk milliaun US\$3.468,000.00.

Tuir JSMP nia haree, alokasaun orsamentu ba programa ida ne’e di’ak tebes, maibé importante atu tau iha konsiderasaun mak implementasaun ka ezekusaun ba orsamentu ne’e. Orsamentu ne’e presiza ezekuta ho transparante no akontabilidade, nune’e bele kontribui ba governasaun ida ne’ebé di’ak, liuliu atinje rezultadu ne’ebé di’ak.

5.5.3. Área prioriedade

Iha parte seluk, JSMP mós haree katak identifika área prioriedade iha alokasaun orsamentu ne’e mós presiza tau iha konsiderasaun. Haree ba situasaun ida pandemia Covid-19 ne’ebé afeta setór hothotu alende setór saúde, JSMP hanoin, Governu presiza aloka orsamentu ne’ebé suficiente ba iha setór ensensiál sira hanesan agrikultura hodi bele asegura subsisténsia hahan ba NASAUN no ekonómia komunidade sira-nian. Iha setór saúde, Governu presiza aloka orsamentu ne’ebé suficiente atu bele apoiu ba políтика no programa Governu nian ba combate pandemia ne’e, tanto ho facilidade, rekursu umanu no finanseira. Enkuantu iha setór edukasaun, Governu presiza aloka orsamentu ne’ebé natoon hodi bele estabelese no apoiu métodu ensinu no aprendizajen ida ne’ebé próprio no adekuadu durante EE no serka sanitaria.

5.5.4. Verba orsamentál la nesesária

JSMP mós observa katak iha OJE 2021 nian, Governu prevee mós verba orsamentál ba iten balun ne’ebé tuir JSMP nian hanoin la nesesáriu. Verba orsamentál la nesesáriu sira ne’e mak verba ba viajen estranjeiru (ezetu ba diplomata sira), sosa karea, viazen lokál, konstrusaun infraestrutura ne’ebé la nesesáriu. Alende ne’e, JSMP hanoin, Governu presiza evita tau orsamentu boot ba instituisaun sira ne’ebé nia serbisu no funzionamento temporáriu hanesan CNE ho STAE hodi koloka filafali orsamentu sira ne’e ba área prioridade sira.

5.5.5. Kumprimentu ba prosedimentu OJE

JSMP apresia mós esforsu no serbisu PN hodi finaliza no aprova OJE 2021 tuir tempu. Nune’e, JSMP husu atu Governu ho kolaborasaun parte hothotu nian bele halo planu ne’ebé di’ak no appropriadu atu bele ezekuta orsamentu ne’e tuir mekanizmu legal ne’ebé prevee ona iha Lei OJE 2021 no lei relevante sira seluk iha implementasaun programa prioritáriu sira hodi asegura transparénsia no akontabilidade. Alende ne’e, bele responde ho di’ak no efetivu ba nesesidade

⁶¹ Detallu husi JSMP nia apresiasaun bele haree iha komunikadu imprensa ne’e: https://jsmp.tl/wp-content/uploads/PrOJEbaPolíтикаPolíтикаJENERU_TETUM.pdf

povu no nasaun nian, liuliu bele normaliza fali situasaun ekonómika iha rai laran ne'ebé afetadu gravemente husi pandemia Covid-19.

5.5.6. Fiskalizasaun Ezekusaun OJE

Iha parte seluk, JSMP mós husu atu PN kontinua ativu iha hala'o nia fiskalizasaun ba ezekusaun OJE 2021 inklui entidade relevante sira seluk hanesan Komisaun Anti Korrupsaun (KAK), sosiedade sívıl no entidade hotu atu hola papél iha serbisu auditoria sosiál hodi asegura transparénsia no akuntabilidade⁶².

JSMP observa katak deputadu opozisaun CNRT la partisipa iha diskusaun OJE 2021 hodi hili *walk out* nu'udar direitu deputadu ida nian, maibé aktu ida ne'e implika halo balansu informasaun iha debate sira.

JSMP hanoin katak persija iha mekanizmu ne'ebé apropiadu atu evita deputadu sira uza walk out mak hanesan bele envolve sira iha diskusaun, maibé laiha direitu ba vota atu nune'e bele hamosu diskusaun ida ne'ebé di'ak iha debate OJE sira.

5.6. Lei Nú. 7/2020 kona-ba Medida sira ba Prevensaun no Kombate Korrupsaun

Parlamentu Nasional iha 20 Julu 2020, liuhusi reuniaun plenária halo diskusaun no aprovisaun iha final global ho unanimidade bá projeto de Lei Nú.1/V (1ª) kona-ba Medida Prevensaun no Kombate Korrupsaun ho votu afavór 61, kontra 0 no abstensaun 0.

JSMP apresisa aas tebes ho inísiativa bankada Fretilin no PD iha vontade di'ak hodi inísia testu projeto lei ne'e ho submete ba PN atu diskute no aprova iha final global no apresia mós ba meza PN foun ne'ebé tau iha konsiderasaun no prioridade atu aselera prosesu diskusaun bá Lei ne'e nu'udar ajenda prioridade no urjénti no JSMP espesialmente apresia ba Komisaun A, Parlamentu Nasional ne'ebé konsege konklui aprovisaun Lei Medida Prevensaun no Kombate Korrupsaun iha diskusaun espesialidade hodi submete mai votasaun iha final global⁶³.

Objetivu Lei ida ne'e, alende Altera Kodígu Penál, Lei Brankeamentu ba Kapítal, Pratíka ba Arte Marsiál, Rituál, Arma-Branka no rama Ambon inklui alterasaun dahuluk ba Lei kona-ba Komisaun Anti-Korrupsaun. Lei ida ne'e mós hatuur medida jerál sira ba prevensaun, kona-ba rejime deklarasaun rendimentu, bein no interesse, defini krimi korrupsaun, pena aplikavel no meiu espesiál atu hetan no rai prova sira.

JSMP iha tempu naruk mak halo advokasia ba kriasaun Lei Medida Prevensaun no Kombate Korrupsaun⁶⁴ tanba ida ne'e bazeia ba rezultadu monitorizasaun JSMP nian iha tribunál, número kazu korrupsaun mós tama iha kategoria aas.

Relaciona ho asuntu ne'e, iha 2019 JSMP prodús paraser rua hodi apresenta JSMP nia deskobrimento no hanoin kona-ba oinsa bele dezenvolve no kria Lei Medida Prevensaun no Kombate Korrupsaun ida ne'ebé bele refleta ho di'ak realidade no fó solusaun ne'ebé efetivu ba kombate korrupsaun iha Timor-Leste. Paraser dahuluk JSMP halo ba testu projeto lei ne'ebé

⁶² Bele asesu iha website JSMP: <https://jsmp.tl/wp-content/uploads/JSMP-husu-atu-Governu-bele-ezekuta-orsamentu-2021-ho-transparansia-no-akontabilidade-15-Dezembru-2020-1.pdf>

⁶³ Bele asesu iha website JSMP: <https://jsmp.tl/wp-content/uploads/PR-aprovisaun-lei-medida-prevensaun-no-kombate-korrupsaun.pdf>

⁶⁴ Detallu husi lei nee bele haree iha website: <http://www.mj.gov.tl/jornal/public/docs/2020/traducao/Traducao-LEI-7-2020.pdf>

bankada Fretilin no PD aprezenta⁶⁵ no paraser daruak JSMP halo ba testu substitutivu ne’ebé Komisaun A prepara depoisde halo audénsia ho parte relevante sira ba testu dahuluk nian⁶⁶.

JSMP konsidera aprovisaun Lei Nú. 7/2020 26 Agostu kona-ba Medida sira ba Prevene no Kombate Korrupsaun ne’e nu’udar instrumentu prinsipál ne’ebé Estadu Timor-Leste bele uza liuhusi nia instituisaun kompetente sira hanesan Ministériu Públiku, Komisaun Anti Korrupsaun (KAK) no instituisaun relevante sira seluk hodi bele haforsa política nacionál ba kombate korrupsaun tanba iha tinan barak lei ne’e “*Budu*” iha PN no sai politizadu husi politiku sira iha kampaña política kada Eléisaun.

JSMP konsidera katak, asuntu korrupsaun nu’udar asuntu ida ho caráter extra-ordináriu, kompleksu no kauza prejuízu boot ba Estadu, NASAUN no povu husi otas ba otas. Tanba ne’e atu kombate korrupsaun, Estadu mós tenke adopta estratéjia no aproximação ida-ne’ebé extra-ordináriu. Estratéjia ne’e ida mak tuir JSMP nia hanoin liuhusi kria Lei ba Medida sira ba Prevene no Kombate Korrupsaun ne’e.

5.7. Alterasaun ba Artigu 1475 Kódigu Sivil Timor-Leste kona-ba Kazamento

Provizaun Alterasaun ba Artigu 1475 nian iha práтика tuir observasaun JSMP no entrevista direta ne’ebé JSMP halo ho líder sira konfisaun reliozu sira husi religiaun Musulmanu no Protestante hatudu katak sira hetan diskriminasaun boot bainhira sira ba trata dokumentu sira iha ministériu relevante sira, liuliu Ministériu Justisa nian. Dokumentu kazamento husi konfisaun religiozu seluk la konsidera válido, nune’e sira labele hetan sertaun kazamento RDTL nian⁶⁷.

Timor-Leste iha Marsu 2002 liuhusi Asembleia Konstituante aprova K-RDTL ne’ebé nu’udar fundamentu ba Estadu-direitu demokrátika ida no K-RDTL ne’e tama iha vigor iha 20 Maiu 2002 hodi implisitamente revoga K-RDTL 1975⁶⁸. Iha K-RDTL tantu ida 1975 nune’e mós ida 2002 nian konsagra ona prinsípiu no valór fundamental sira kona-ba universalidade no igualdade ba ema hothotu. Provizaun sira iha Artigu 16 pontu 1) K-RDTL 2002 prevee katak:

“ema hothotu hanesan iha lei nia oin, goza direitu sira ne’ebé hanesan no sujeita ba devér sira ne’ebé hanesan” no iha pontu daruak prevee katak *“la iha ema ida mak hetan diskriminasaun bazeia ba kór, rasa, estadu sivil, orijen étnika, língua, posizaun sosiál, konvikaun política ka ideolójika, religiaun, instrusaun ka kondisaun fízika ka mentál”*.

Enkuantu ko’alia kona-ba religiaun, Estadu Timor-Leste nu’udar Estadu demokrátiku ida ne’ebé rekoñese no respeita konfisaun religioza ne’ebé diferente no asegura sira-nia liberdade ba organizasaun no ezersisíu ba sira-nia atividade sira hanesan prevee iha Artigu 12 pontu 1) K-RDTL⁶⁹.

⁶⁵ Detallu husi paraser iha ne’e: <http://jsmp.tl/wp-content/uploads/PARESER LEI-ANTI-KORRUPSAUN TETUM.pdf>

⁶⁶ Detallu husi paraser iha ne’e: <http://jsmp.tl/wp-content/uploads/Paraser-kona-ba-testu-substitutivu-ba-lei-anti-korrupsaun II - 2019.pdf>

⁶⁷ Informasaun detallu bele asesu ba sumariu peskiza no analiza lejizlativu JSMP nian iha ne’e: <http://jsmp.tl/wp-content/uploads/Pareser-ICCPRKazamentoSivilartigu1475FINAL TETUM.pdf>

⁶⁸ Versaun elektronika K-RDTL 1975 iha ne’e: <http://cedis.fd.unl.pt/wp-content/uploads/2016/02/CONST-TIMOR-75.pdf>

⁶⁹ Testu kompletu K-RDTL iha ne’e: http://www.mj.gov.tl/jornal/public/docs/ConstituicaoRDTL_Portugues.pdf

Alende Konstituisaun, Timor-Leste iha Maiu 2003 ho Rezolusaun PN Nú.3/2003⁷⁰ ratifika Konvensaun Internasional ba Direitu Sivil no Politika (ICCPR). ICCPR ne'e nu'udar enkuadramentu legal internasional ida ne'ebé regula espesifikasiamente kona-ba direitu ema nian tuir prinsípiu sira ne'ebé konsagra ona iha Karta Nasoins Unidas⁷¹ nian kona-ba ema nia direitu sivil no politika ne'ebé Estadu membru sira tenke respeita no promove. ICCPR ne'e hanesan parte ki'ik ida ka lei oan ida husi Karta Nasoins Unidas nian.

Iha Artigu 2.1. ICCPR nian prevee katak

“Estadu parte idaidak husi Konvensaun ne'e halo buat ruma hodi respeitu no asegura ba ema hothotu iha nia rain no nia jurisdisaun direitu sira ne'ebé rekoñese iha Konvensaun ne'e la ho distinsaun ruma hanesan rasa, kór, seksu, língua, relijiaun, política ka opiniaun ketak, orijen nasional ka sosiál, propriedade, moris ka estatutu seluk”.

Iha Artigu 18.1. ICCPR katak:

“ema hothotu tenke iha direitu ba liberdade hanoin, konsiénsia no relijiaun. Direitu ida ne'e tenke inklui liberdade hodi hetan ka adota relijiaun ka fiar tuir eskolla rasik, no liberdade ne'e bele individuál no bele mós iha komunidade ho sira seluk no manifesta iha pùblika ka privadu nia relijiaun ka fiar liuhusi adorasaun, obsrvaánsia, práтика no hanorin”⁷².

ICCPR ne'e rasik iha nia Artigu 2.2. husu ba Estadu parte sira ne'ebé seidauk estabelese medida lejizlativu ruma hodi asegura ezersísiu ba direitu sira ne'ebé prevee iha Konvensaun hodi bele kria mekanizmu lejizlativu ruma tuir Konstituisaun rai idaidak nian no mós Konvensaun ne'e rasik hodi bele halo efeitu ba direitu sira ne'ebé konsagra iha ne'e. Nune'e, Estadu Timor-Leste iha Setembru 2011 kria Lei Nú.10/2011⁷³ hodi aprova Kódigu Sivil hodi regula relasaun jurídika sira entre entidade jurídiku privadu sira hanesan ema ida-idak ka ema koletivu. Lei ne'e atu asegura ezersísiu direitu sivil sidadaun sira-nian.

Kódigú Sivil sai hanesan baze ida mós ba lei sivil sira iha Timor-Leste, ne'ebé regula ema Timoroan husi moris to'o mate. Kódigú Sivil hatur regras sira kona-ba familia hanesan kazamentu, adopsaun, paternidade, patrimónia, divórsiu no éransa no mós kona-ba propriedade.

Iha prinsípiu, Kódigu Sivil ne'e di'ak ona, maibé sei iha provizaun ne'ebé kontráriu ho prinsípiu sira ne'ebé konsagra jeralmente iha Karta Nasoins Unidas nian no iha partikulár iha ICCPR no K-RDTL. Provizaun Artigu 1475 Kódigu Sivil kona-ba kazamentu sivil, katóliku no barlakeadu monogámika ne'e esplisitamente konstitui aktu diskriminasau hasoru konfisaun relijiozu sira seluk ne'ebé la'ós Katóliku hanensan Protestante, Musulmanu, Buda, nsst. Lei ne'e valoriza, rekoñese ka legalize de'it relijiaun Katólika hodi konsidera válido de'it kazamentu katóliku. Nune'e, Lei ne'e iha práтика lori no obriga ona Estadu Timor-Leste práтика aktu diskriminatóriu iha servisu pùbliku sira Estadu nian hasoru sidadaun timoroan no estranjeiru sira ne'ebé la'ós

⁷⁰ Testu kompletu Rezolusaun PN Nú. 3/2003 iha ne'e:

http://www.mj.gov.tl/jornal/public/docs/2002_2005/resolucao_parlamento/3_2003.pdf

⁷¹ Testu kompletu kona-ba Karta Nasoins Unidas nian iha ne'e: <https://nacoesunidas.org/wp-content/uploads/2017/11/A-Carta-das-Na%C3%A7%C3%A7%C5es-Unidas.pdf>

⁷² Testu kompletu ICCPR iha dalen Inglés iha ne'e: http://www.mj.gov.tl/jornal/public/docs/ConstituicaoRDTL_Portugues.pdf

⁷³ Testu kompletu kona-ba Lei Nú. 10/2011 nian iha ne'e: <http://www.mj.gov.tl/jornal/?q=node/803>

Katóliku no la rekoñese no respeita konfisaun religiozu sira seluk ne'ebé kontrátriu ho provizaun sira iha Artigu 12.1 K-RDTL no Artigu 18.1 ICCPR.

Aktu diskriminasaun Estadu nian hasoru sidadaun sira ho konfisaun religiozu ketak ka la'ós Katóliku liuhusi instituisaun sira Estadu nian dala barak akontense no sai ona preokupasaun públiku nian. JSMP nia parte haree no konsidera asuntu ida ne'e nu'udar asuntu sériu ne'ebé Estadu Timor-Leste presiza fó solusaun, partikularmente Governu no PN. Timor-Leste nu'udar Estadu Direitu Demokrátiku labele kria medida lejizlativu ne'ebé konstitui violasaun ba prinsípiu direitu sira ema nian ne'ebé konsagra iha instrumentu legál internasional sira ne'ebé estadu ratifika no mós iha K-RDTL rasik.

Provizaun Artigu 1475 Kódigu Sivíl konstitui aktu diskriminasaun grave hasoru sidadaun sira ne'ebé la'ós religiaun Katólika atu hetan asesu ba servisu públiku sira Estadu nian partikularmente dokumentu ofisiál sira. Provizaun ne'e kontráriu ho prinsípiu sira ne'ebé konsagra iha ICCPR no K-RDTL no viola direitu sidadaun sira ne'ebé la'ós religiaun Katólika. Nune'e, provizaun ida ne'e presiza hadi'a atu asegura protesaun no promosaun direitu umanu ba sidadaun hotu tuir norma no prinsípiu sira ne'ebé konsagra iha Konstituisaun.

VI. Advokasia

Advokasia nu'udar meu ida-ne'ebé JSMP uza hodi kontribui ba hadi'a no promove sistema no funzionamento setór justisa no lejizlativu. Atividade ne'e ho objetivu atu influénsia autór prinsipál sira ne'ebé iha kompeténsia tuir K-RDTL no lei sira atu influénsia no foti desizaun sira iha sistema política, lejizlativu no mós judisiáriu.

Meu sira ne'e mak liuhusi fornese hanoin alternativu balun ne'ebé bele tulun político no órgaun ka instituisaun públiku kompetente sira iha prosesu halo desizaun sira bele foti desizaun sira ne'ebé refleta ba interesse ema barak nian liuhusi desizaun política no lejizlativu ne'ebé refleta realidade moris, aspirasaun no interesse povu no nasau nian, nune'e mós asegura justisa ne'ebé justu ba ema hotu tuir lei sira.

Meu sira ne'ebé JSMP uza durante ne'e hodi halo advokasia mak hanesan hakerek paraser ka submisau, halo audénsia, hakerek sumáriu analiza lejizlativu no política, halo programa TV, programa rádiu, prodús komunikadu imprensa, súmariu kazu sira no publika informasaun sira iha website no FB JSMP nian, nune'e mós iha jornál Timor Post no Diário Nacionál. Alende, JSMP halo advokasia liuhusi partisipa iha rede direitu umanu no justisa nacionál no internasionál.

Asuntu prioridade sira ba Advokasia JSMP nian durante ne'e mak hanesan Lei Medida Prevensaun no Kombate Korrupsaun, alterasaun ba Artigu 1475 Kodígu Sivíl, alterasaun ba Kodígu Penál hodi inklui artigu espesífiku kona-ba insestu, Lei Orden Advogadu sira nian, Lei Protesaun ba Labarik no halo advokasia regulár ba proposta OJE kada tinan antes aprovisaun, liuliu relasiona ho orsamentu ne'ebé prevee ba setór justisa nian.

6.1. Paraser

Iha 2020, JSMP konsege prodús no publika paraser bazeia ba analiza lejizlativu hamutuk Paraser (2), paraser hirak ne'e mak hanesan:

- Paraser kona-ba Alterasaun daneen ba Kódigu Penál ne'ebé aprova ho Dekretu Lei Nú. 19/2009: Kriminaliza Difamaun no Injuría⁷⁴.
- Paraser kona-ba Opsaun alternativa ba solusaun situsaun política pós rejeisaun Proposta Lei OJE 2020 iha Parlamentu Nasional⁷⁵.

Paraser ne'ebé JSMP prodús bazeia ba atividade analiza JSMP nian iha serbisu lezislasaun sira no mós pedidu husi Parlamentu Nasional no Governu ho nia intensaun atu fó hanoin alternativu ne'ebé konstrutivu bazeia ba peskiza no esperensia JSMP nian bainhira hala'o monitorizaun sira iha tribunál no Parlamentu no mós treinamentu ba komunidade sira iha baze.

6.2. Sumáriu mensál

JSMP iha tinan 2020 mós prodús sumáriu mensál ba atividade Parlamentu Nasional no advokasia nu'udar meu ida husi JSMP atu bele atualiza situsaun atuál parlamentu nasional no progresu serbisu sira iha área advokasia nian ne'ebé JSMP planeia ona iha kada tinan.

⁷⁴Bele asesu paraser iha website JSMP: https://jsmp.tl/wp-content/uploads/JSMP_Pareser_Esbosu-Lei-Difamaun-no-Injuria-2020.pdf

⁷⁵ Bele asesu paraser iha website JSMP: https://jsmp.tl/wp-content/uploads/Paraser-kona-ba-OJE-2020-ba-Prezidente-Republika_TETUM.pdf

Sumáriu hirak ne’ebé JSMP prodús ona hamutuk 8 mak hanesan:

- Sumáriu Atividade Advokasia Asuntu Kriminaliza Difamasaun no Injúria ne’ebé mak públika iha fulan Agunstu 2020⁷⁶.
- Sumáriu: Atividade Parlamentu Nasional fulan Agosto 2020⁷⁷.
- Sumáriu: Atividade Parlamentu Nasional fulan Setembru 2020⁷⁸.
- Sumáriu Atividade Advokasia asuntu Liberdade ba Reuniaun no Manifestasaun⁷⁹.
- Sumáriu: Atividade Parlamentu Nasional fulan Outubru 2020⁸⁰.
- Sumáriu Mensál: Atividade Parlamentu Nasional iha fulan Novembru 2020⁸¹.
- Sumáriu mensal Novembru 2020 kona-ba Pontu de vista JSMP kona-ba modalidade sira kazamentu nian tuir Lei número 10/2011 Kódigu Sivil⁸².
- Sumáriu Atividade Mensál Parlamentu Nasional fulan Dezembru 2020⁸³.

JSMP konsidera importante husi sumáriu ne’e mak atu atualiza informasaun sira kona-ba serbisu sira Parlamentu nian liiliu liga ho sira nian atividade sira iha plenária no Komisaun Espesializada Permanente sira espesialmente iha Komisaun A ne’ebé durante ne’e JSMP halo monitorizasaun ba sira nia atividade serbisu sira.

Alende ne’e mós, asuntu sira advokasia ne’ebé sai nu’udar papél importante atu fanun entidade relevante sira hodi tau sira-nia preokupasaun ba asuntu sira ne’ebé JSMP mensiona iha JSMP nia publikasaun sira.

6.3. Audénsia Públiku

JSMP mós halo audénsia ho parte relevante sira iha setór justisa, lejizlativu no ezekutivu ba asuntu sira ne’ebé JSMP halo hela advokasia. Audénsia sira, JSMP alende halo mesak, halo mós hamutuk ho sosiedade sivil sira seluk.

Audénsia pública ne’e nu’udar meiu advokasia ida ne’ebé JSMP uza hodi apresenta JSMP nia hanoin, deskobrimentu no rekomendasau sira ba órgaun no instituisau relevante sira atu bele halo mudansa no hadi’ a antes halo desizaun ruma ne’e mak presiza tau iha konsiderasaun.

Iha 2020 JSMP halo audénsia ho entidade sira mak hanesan Ministru Justisa hodi ko’alia kona-ba Alterasaun daneen ba Kódigu Penál ne’ebé aprova ho Dekretu Lei Nú. 19/2009: Kriminaliza

⁷⁶ Bele asesu informsaun kompleitu iha website JSMP: <https://jsmp.tl/wp-content/uploads/SumariuAtividadeAsuntuKriminalizaDifamasaunInjuria-1.TETUM.pdf>

⁷⁷ Bele asesu informsaun kompleitu iha website JSMP: <https://jsmp.tl/wp-content/uploads/SumariuAtividadeParlamentuNasional.TETUM-1.pdf>

⁷⁸ Bele asesu informsaun kompleitu iha website JSMP: https://jsmp.tl/wp-content/uploads/SumariuAtividadeMensalPN_Setembru.TETUM.pdf

⁷⁹ Bele asesu informsaun kompleitu iha website JSMP: <https://jsmp.tl/wp-content/uploads/Sumariu-Atividade-Mensal-Advokasia-Demonstrasaun.TETUM.pdf>

⁸⁰ Bele asesu informsaun kompleitu iha website JSMP: https://jsmp.tl/wp-content/uploads/Suma%CC%81riu-atividade-mensa%CC%81l-PN_Outubru_2020.pdf

⁸¹ Bele asesu informsaun kompleitu iha website JSMP: <https://jsmp.tl/wp-content/uploads/Sumariu-atividade-mensal-PN-Nov2020.pdf>

⁸² Bele asesu informsaun kompleITU iha website JSMP: <https://jsmp.tl/wp-content/uploads/Pontu-de-vista-JSMP-nian-kona-ba-modalidade-sira-kazamentu.pdf>

⁸³ Bele asesu informsaun kompleITU iha website JSMP: <https://jsmp.tl/wp-content/uploads/Sumariu-atividade-mensal-PN-fulan-Dezembru-2020.pdf>

Difamasaun no Injúria⁸⁴. Nune'e, mós hamutuk ho membru sosiedade sivíl sira seluk ho naran Movimentu Kontra Kriminaliza Difamasaun no Injúria ba halo audénsia ho Ministru Konsellu Ministru hodi apresenta hanoin no petisaun kona-ba asuntu kriminaliza difamasaun no injúria⁸⁵.

Alende halo audénsia ho Governu, JSMP mós halo audénsia ho komisaun A, PN hodi ko'alia kona-ba alokasaun orsamentu jerál iha setór justisa.

6.4. Komunikadu Imprensa

JSMP frequentemente prodús komunikadu imprensa sira bazeia ba atividade monitorizasaun sira iha PN, Tribunál no mós treinamentu ka advokasia nu'udar meu ida atu fornese informasaun sira ba públiku no mós hanesan meiu advokasia ida ba halo mudansa ka hadi'a sistema no funzionamento órgaun no instituisaun públiku sira Estadu nian.

Iha períodu tinan 2020, JSMP prodús komunikadu imprensa hamutuk 31 ho nia detallu ba kada tópiku sira mak hanesan tuir mai ne'e:

- Komunikadu Imprensa 15 Dezembru 2020, JSMP husu atu Governu bele ezekuta orsamentu 2021 ho transparánsia no akontablidade⁸⁶.
- Komunikadu Imprensa 01 Dezembru 2020, Governu Konstitusionál VIII inklui Orsamentu ba Implementasaun Polítika Jenéru iha Programa Orsamentu 2021⁸⁷.
- Komunikadu Imprensa 30 Novembru 2020 JSMP husu ba Komisaun A PN atu hadi'a nia mekanizmu audénsia públika iha futuru⁸⁸.
- Komunikadu Imprensa 25 Novembru 2020 Audénsia públiku kona-ba esbosu Lei Podér lokál no Desentralizasaun Administrativa no Lei Eleitorál Munisipál: JSMP remomenda atu pepara dokumentu sira iha lian Tetun no fahe antes ba partisipante sira⁸⁹.
- Komunikadu Imprensa 11 Novembru 2020, Komisaun A PN Primeiravés Envolve Representante Governu Lokál sira iha Audénsia Orsamentu Jerál Estadu 2021⁹⁰.
- Komunikadu Imprensa 11 Novembru 2020, OJE 2021 MAE kontinua hatama insentivu US\$30 kada fulan ba membru konsellu suku⁹¹.
- Komunikadu Imprensa 29 Outubru 2020, Ezerse Liberdade iha Estadu Demokrátiku no Protesaun ba Sasin Sai Preokupasaun iha Suku Sagadate⁹².

⁸⁴ JSMP nia paraser kona-ba asuntu ne'e bele asesu ne'e: https://jsmp.tl/wp-content/uploads/JSMP_Pareser_Esbosu-Lei-Difamasaun-no-Injuria-2020.pdf

⁸⁵ JSMP no movimentu ne'e nia petisaun ne'ebé apresenta ba Ministru iha ne'e: https://jsmp.tl/wp-content/uploads/PETISAUN_MOVIMENTU_KONRA_KRIMINALIZA_DIFAMASAUN_TETUM.pdf

⁸⁶ Bele asesu informsaun kompleitu iha website JSMP: <https://jsmp.tl/wp-content/uploads/JSMP-husu-atu-Governu-bele-ezekuta-orsamentu-2021-ho-transparansia-no-akontablidade-15-Dezembru-2020-1.pdf>

⁸⁷ Bele asesu informsaun kompleitu iha website JSMP: https://jsmp.tl/wp-content/uploads/PrOJEbaPolitikaJENERU_TETUM.pdf

⁸⁸ Bele asesu informsaun kompleitu iha website JSMP: https://jsmp.tl/wp-content/uploads/PrKonsultaPublikuMunisipiuermera_TETUM.pdf

⁸⁹ Bele asesu informsaun kompleitu iha website JSMP: https://jsmp.tl/wp-content/uploads/PrAudensiaPubliku_TETUM.pdf

⁹⁰ Bele asesu informsaun kompleitu iha website JSMP: https://jsmp.tl/wp-content/uploads/PrEnvolveGOVERNULOKAL_TETUM.pdf

⁹¹ Bele asesu informsaun kompleitu iha website JSMP: https://jsmp.tl/wp-content/uploads/PrMAEAlokaSubsidubaKonselluSuku_TETUM.pdf

⁹² Bele asesu informsaun kompleitu iha website JSMP: https://jsmp.tl/wp-content/uploads/PrTreinamentuFSSSagadateBAUCAU_TETUM.pdf

- Komunikadu Imprensa 28 Outubru 2020, PN aprova rezolusaun ba medida prevensaun sira iha kazu infantisídu no abandona bebe no labarik: JSMP apresia no husu entidade sira implementa rekomendasaun sira ne'e⁹³.
- Komunikadu Imprensa 20 Outubru 2020, JSMP apresia deputadu proponente sira ba iniciativa submete rezolusaun ba medida prevensaun sira iha kazu infantisídu no abandona bebe no labarik⁹⁴.
- Komunikadu Imprensa 02 Outubru 2020, Membru Konsellu no Komunidade Suku Uma-Naruk preokupa ho kazu insestu⁹⁵.
- Komunikadu Imprensa 18 Setembru 2020, JSMP apresia ho planu Prezidente Parlamentu Nasional nian “Harii edifisiu PN, hadi'a kualidade fiskalizasaun no kria Komisaun Espesializada Permanente ba Sidadania”⁹⁶.
- Komunikadu Imprensa 18 Setembru 2020, Bankada CNRT retira husi plenária: JSMP husu atu buka solusaun hodi labele prejudika efetividade servisu Parlamentu⁹⁷.
- Komunikadu Imprensa 03 Setembru 2020, Konsidera asuntu Demokrácia no Asesu ba Justisa Formál Importante Membru Konsellu Suku Kairui husu JSMP kontinua halo treinamentu iha sira-nia suku⁹⁸.
- Komunikadu Imprensa 04 Agostu 2020, Suku Atabae sei falta informasaun kona-ba asesu ba justisa formal⁹⁹.
- Komunikadu Imprensa 22 Jullu 2020 JSMP, apresia vontade política PN hodi aprova Lei kona-ba Medida Prevensaun no Kombate Korrupsaun ho unanimidade¹⁰⁰.
- Komunikadu Imprensa 15 Jullu 2020, JSMP apresia Parlamentu Nasional ba hanaruk funzionamentu serbisu hodi finaliza lei importante sira¹⁰¹.
- Komunikadu Imprensa 07 Jullu 2020, JSMP apresia estrutura foun Parlamentu Nasional ba funzionamentu normál plenaria¹⁰².
- Komunikadu Imprensa 02 Jullu 2020, JSMP apresia ho método aberto no partisipativu ne'ebé Komisaun A, PN aplika durante diskusaun espesialidade ba projetu Lei Anti Korupsaun iha Manufahi¹⁰³.

⁹³ Bele asesu informsaun kompleitu iha website JSMP: https://jsmp.tl/wp-content/uploads/PrPNAprovaRezolusaunbaAsuntuINFANTESIDIU_TETUM.pdf

⁹⁴ Bele asesu informsaun kompleitu iha website JSMP: https://jsmp.tl/wp-content/uploads/PrJSMPApresiaPNProduseRezolusaunbaINFANTESIDIU_TETUM.pdf

⁹⁵ Bele asesu informsaun kompleitu iha website JSMP: <https://jsmp.tl/wp-content/uploads/Memburu-Konsellu-no-Komunidade-Suku-Uma-Naruk-preokupa-ho-kazu-insestu-2-Outubru-2020.pdf>

⁹⁶ Bele asesu informsaun kompleITU iha website JSMP: https://jsmp.tl/wp-content/uploads/PrJSMPApresiaPNHariEdifisiuFOUNbaPN_TETUM.pdf

⁹⁷ Bele asesu informsaun kompleITU iha website JSMP: https://jsmp.tl/wp-content/uploads/PrBankadaCNRTWalkOuthusiPN_TETUM.pdf

⁹⁸ Bele asesu informsaun kompleITU iha website JSMP: https://jsmp.tl/wp-content/uploads/PrTreinamentuKomunidadeSukuKAIRUIManatutu_TETUM.pdf

⁹⁹ Bele asesu informsaun kompleITU iha website JSMP: https://jsmp.tl/wp-content/uploads/PrTreinamentuFSSATABAE_TETUM.pdf

¹⁰⁰ Bele asesu informsaun kompleITU iha website JSMP: <https://jsmp.tl/wp-content/uploads/PR-aprovasaun-lei-medida-prevensaun-no-kombate-korupsaun.pdf>

¹⁰¹ Bele asesu informsaun kompleITU iha website JSMP: https://jsmp.tl/wp-content/uploads/PrJSMPApresiaPNHanarukSerbisu_TETUM.pdf

¹⁰² Bele asesu informsaun kompleITU iha website JSMP: https://jsmp.tl/wp-content/uploads/PR-JSMP-apresia-estrutura-foun-PN-tuir-rejimentu-PN_TETUM.pdf

¹⁰³ Bele asesu informsaun kompleITU iha website JSMP: https://jsmp.tl/wp-content/uploads/PrJSMPniaObservasaundebateLAK_TETUM.pdf

- Komunikadu Imprensa 19 Juñu 2020, JSMP husu ba membru deputadu sira atu respeita Konstituisaun no lei sira bainhira hala'o sira-nia knaar iha Parlamentu Nasional¹⁰⁴.
- Komunikadu Imprensa 04 Juñu 2020, JSMP husu ba deputadu sira hotu atu bele serbisu hamutuk ho estrutura Meja Parlamentu foun hodi asegura funzionamento PN¹⁰⁵.
- Komunikadu Imprensa 19 Maiu 2020, JSMP lamenta no preokupa ho aktu dezorganizadu husi deputadu sira no ejijé deputadu sira atu respeita lei nu'udár meu atu dignifika PN¹⁰⁶.
- Komunikadu Imprensa 19 Maiu 2020, JSMP preokupa ho funzionamento Parlamentu Nasional nian iha inísiu Maiu 2020¹⁰⁷.
- Komunikadu Imprensa 12 Maiu 2020, JSMP husu ba parte sira atu respeita desizaun Tribunál Rekursu relasiona ho desizaun ba petisaun Partidu CNRT¹⁰⁸.
- Komunikadu Imprensa 17 Abril 2020, JSMP husu ba entidade kompetente sira asegura ezekusaun fundu Covid-19 tuir lei¹⁰⁹.
- Komunikadu Imprensa 31 Marsu 2020, Xefe suku Hataz rekoñese katak Konsellu Suku no komunidade sira falta tebes informasaun sira hanesan JSMP fahe liuhusi treinamento ne'e¹¹⁰.
- Komunidade Imprensa 26 Marsu 2020, Komunidade Suku Fatumasi preokupa ho impase polítku no kazu abandona labarik¹¹¹.
- Komunikadu Imprensa 24 Marsu 2020, Xefe Suku Uaguia: Formasaun husi JSMP benefisiu tebes ba líder komunitáriu nomós komunidade sira iha Suku Uaguia, Munisípiu Vikeke¹¹².
- Komunikadu Imprensa 18 Marsu 2020, JSMP kontinua subliña direitu grupu vulnerável sira bainhira fasilita treinamento iha Munisípiu Lautein (Lautem)¹¹³.
- Komunikadu Imprensa 06 Marsu 2020, Partisipante Suku Beiseuc preokupa ho kazu krime no kazu sivil ne'ebé prosesu la'o kle'ur¹¹⁴.
- Komunikadu Imprensa 17 Fevereiru 2020, Komiasun A Parlamentu Nasional halo konsulta públiku ba Esbosu Lei Podér lokál no Desentralizasaun Administrativa no Lei Eleitorál Munisipá¹¹⁵.
- Komunikadu Imprensa 12 Fevereiru 2020, Komisaun A PN prepara ona kalendáriu diskusaun bá Esbosu Lei Anti-Korrupsaun¹¹⁶.

¹⁰⁴ Bele asesu informsaun kompleitu iha website JSMP: <https://jsmp.tl/wp-content/uploads/PR-Atitude-memburu-deputadu-PN-la-tuir-K-RDTL-no-lei.pdf>

¹⁰⁵ Bele asesu informsaun kompleitu iha website JSMP: https://jsmp.tl/wp-content/uploads/PrPNkolaborahoEstruturaFounMezaPN_TETUM.pdf

¹⁰⁶ Bele asesu informsaun kompleitu iha website JSMP: https://jsmp.tl/wp-content/uploads/PrJSMLamentahoPN_TETUM.pdf

¹⁰⁷ Bele asesu informsaun kompleitu iha website JSMP: https://jsmp.tl/wp-content/uploads/PrJSMPKestionariaFunzionamentoPN_TETUM.pdf

¹⁰⁸ Bele asesu informsaun kompleitu iha website JSMP: https://jsmp.tl/wp-content/uploads/PrJSMPhusuPartesiraRespeitaDesizaunTR_TETUM.pdf

¹⁰⁹ Bele asesu informsaun kompleitu iha website JSMP: https://jsmp.tl/wp-content/uploads/PrPWPPNAprovaOrsamentubaCOVID-19_TETUM.pdf

¹¹⁰ Bele asesu informsaun kompleitu iha website JSMP: https://jsmp.tl/wp-content/uploads/PrtreinamentoSukuHatazAtabaeFSS_Tetum.pdf

¹¹¹ Bele asesu informsaun kompleitu iha website JSMP: https://jsmp.tl/wp-content/uploads/PrTreinamentoFSSSuKUFAtumasilJKISA_Tetum.pdf

¹¹² Bele asesu informsaun kompleitu iha website JSMP: https://jsmp.tl/wp-content/uploads/PrTreinamentoSukuUaguiaVIKEKE_TETUM.pdf

¹¹³ Bele asesu informsaun kompleitu iha website JSMP: <https://jsmp.tl/wp-content/uploads/PR-Treinamento-ba-Grupu-LGBTI-ih-a-Lautein.pdf>

¹¹⁴ Bele asesu informsaun kompleitu iha website JSMP: https://jsmp.tl/wp-content/uploads/PrTreinamentoEstruturaSUKUBeiseucSUAI_TETUM.pdf

¹¹⁵ Bele asesu informsaun kompleitu iha website JSMP: https://jsmp.tl/wp-content/uploads/JSMPMonitoringKomAhaloKonsultaPublikoCOVALIMA_TETUM.pdf

VII. Hasa'e koñesimentu membru Konsellu Suku iha área remota

Iha tinan 2020, Alende implementa programa prinsipál sira hanesan halo monitorizasaun regularmente ba Tribunál sira no reunioun plenária Parlamentu Nasional no reunioun Komisaun, PN. JSMP mós kontinua fasilita treinamento ba membru Konsellu Suku inklui komunidade ne'ebé envolve mós ema ho vulneravél sira.

Objetivu husi treinamento ida-ne'e mak atu hasa'e koñesimentu membru Konsellu Suku no komunidade sira nian kona-ba Demokrasia, knaar órgaun soberanu sira-nian, partisipasaun públiku iha prosesu halo lei no asesu ba prosesu justisa formál iha Timor-Leste. Nune'e, membru konsellu suku sira bele hala'o sira-nia knaar ho di'ak, efetivu no tuir lei no Konsellu Suku no komunidade sira bele hatene ho di'ak sira-nia diretiu no devér sira iha estadu-direitu demokrátiku. Alende ne'e, sira mós bele hatene kona-ba knaar órgaun soberanu idaidak nian, nune'e sira bele hatene mekanizmu oinsa bele hato'o sira-sira preukupasaun sira, reklamasau no keixa rumá bainhira iha problema rumá hasoru sira no mós bele halo denúnsia rumá bainhira ema seluk hasoru problema ka sira-nia direitu hetan violasaun.

Ligadu ho asuntu prosesu justisa formál nian komunidade sira bele hatene ho di'ak knaar autór judisiáriu sira ne'ebé serbisu iha setór justisa nian hanesan juis iha Tribunál, prokuradór iha Ministériu Públiku, defensór iha Defensoria Pública, Advogadu Privadu no Polísia. Alende ne'e, konsellu suku no komunidade sira bele iha koñesimentu kona-ba kazu krime no sivil sira no oinsá nia prosesu tuir prosedimentu legal ne'ebé establese ona.

Treinamento ba líder komunitária ne'e mós bele ajuda hakle'an membru konsellu suku sira-nia koiñesimentu atu hatene ho di'ak sira-nia knaar no kompeténsia sira no bele identifika kazu krime no sivil hodi halo prosesu no mós bele rezolve problema sira tuir mekanizmu formál no informál ne'ebé hatúr ona iha lei sira.

Totál treinamento ne'ebé JSMP realiza, partikularmente treinamento sira ne'ebé tama iha responsabilidade Unidade Observasaun Parlamentár nian iha 2020 hamutuk 9 ne'ebé kompostu husi treinamento ba membru konsellu suku ne'ebé involve komunidade no ema ho defisiénsia sira iha nivél munisípiu mak hanesan munisípiu Covalima, Lautein, Likísa, Vikeke, Bobonaro, Manatutu, no Baukau.

Treinamento sira ne'e, JSMP realiza iha suku sira mak hanesan Suku Uaguia Postu Administrativu Ossu, Munisípiu Vikeke, Suku Fuiloro Postu Administrativu Lospalos, Munisípiu Lautein, Suku Beiseuc, Postu Administrativu Tilomar, Munisípiu Covalima, Suku Hataz no Atabae Postu Administrativu Atabae, Bobonaro, Suku Cairui-Postu Administrativu Laleia no Suku Uma Naruk, Postu Administrativu Laclo, Munisípiu Manatutu, Suku Sagadate iha Postu Administrativu Laga, Munisípiu Baukau no Suku Fatumasi, Postu Administrativu Bazartete, Munisípiu Likisá.

7.1. Preokupasaun komunidade nian

Partisipante husi Suku Beiseuc, Postu Administrativu Tilomar, Munisípiu Covalima hato'o sira nia preokupasaun balun kona-ba kazu krime no kazu sivil ne'ebé nia prosesu kle'ur liu tanba vítima sira ne'ebé mak afeitadu husi krime ida hakarak teb-tebes sira-nia prosesu ne'e la'o lalais.

¹¹⁶ Bele asesu informsaun kompleitu iha website JSMP: <https://jsmp.tl/wp-content/uploads/PR-Komisaun-A-PN-Prepara-kalendariu-ba-Diskusan-Esbosu-Lei-Anti-Korrupsau.pdf>

Sira mós lamenta tanba iha kazu krime ne'ebé akontese nia prosesu la'o kle'ur liu bele mós afeita ba vítima haluha ona faktu akontesimentu sira¹¹⁷.

Partisipante sira husi Suku Uaguia Postu Administrativu Ossu, Munisípiu Vikeke hato'o preokupasaun sira relasiona ho sistema política ho modelu monarkia no repúblika no mós kestaun tanba sá la halo eleisaun ba administradór postu sira.

Iha kestaun justisa nian partisipante sira kestiona kona-ba prosesu sira oinsá sai na'in ba rai no mós atuasaun polísia nian ne'ebé sempre ho violénsia, no mós oinsa dalan ba prosesu kazu abandona labarik sira¹¹⁸.

Partisipante Suku Fuiloro Postu Administrativu Lospalos, Munisípiu Lautem kestiona kona-ba aplikasaun sistema demokrázia iha Timor-Leste ne'ebé livre tebes hodi hamosu inrespeitu iha vida moris lorloron nian entre comunidade sira. Alende ne'e partisipante sira mós hato'o sira nia preokupasaun kona-ba kazu inestu ne'ebé nia número komesa sa'e aas no oinsá atu halo prosesu ba kazu ida ne'e¹¹⁹.

Partisipante husi Suku Fatumasi, Postu Adminiatrativu Bazartete, Munisípiu Likisá kestaun sira ne'ebé partisipante sira foti mak kona-ba asuntu empase política ne'ebé to'o agora laiha solusaun, sistema demokrázia ne'ebé fó liberdade liu ba ema, eleisaun antesipada no kestaun pensaun vitalísia.

Entretantu iha sesaun kona-ba asesu ba justisa formál, partisipante sira hato'o sira-nia preokupasaun sira liga ho labarik sira ne'ebé abandona husi inan-aman, krimé violénsia doméstika ne'ebé mak akontese iha família no ikus ema seluk mak ba hato'o keixa inklui kazu omisídui ne'ebé lahatega autór¹²⁰.

Partisipante husi Suku Hataz, Postu Administrativu Atabae, Munisípiu Bobonaro hato'o sira-nia preokupasaun relasiona ho direitu no devér sira iha NASAUN ne'ebé uza sistema demokrasia, nune'e mós oinsa prosesu kazu krime violénsia seksuál no violénsia doméstika inklui mós kazu sivíl kona-ba na'in ba rai ne'ebé akontese iha sira nia suku no oinsa dalan atu halo prosesu kazu hirak ne'e tuir justisa formál¹²¹.

Paritispante husi Suku Atabae, Postu Administrativu Atabae, Munisípiu Bobonaro preukupa kona-ba Timor-leste harii partidu bara-barak no lei ne'ebé mak regula hodi limita harii partidu politiku iha Timor-Leste.

Entretantu kona-ba asesu bá justisa partisipante sira husu kona-ba oinsá halo prosesu ba kazu abandona labarik no oinsá ita rekoñese kazamentu ne'ebé legál. Alende ne'e, sira mós husu

¹¹⁷ Bele haree website JSMP: https://jsmp.tl/wp-content/uploads/PrTreinamentubaEstruturaSUKUBeiseucSUAI_TETUM.pdf

¹¹⁸ Bele haree info kompleitu iha website JSMP: https://jsmp.tl/wp-content/uploads/PrTreinamentuSukuUaguiaVIKEKE_TETUM.pdf

¹¹⁹ Bele haree info kompleitu iha website JSMP: <https://jsmp.tl/wp-content/uploads/PR-Treinamentu-ba-Grupu-LGBTI-ih-Lautein.pdf>

¹²⁰ Bele haree info kompleitu iha website JSMP: https://jsmp.tl/wp-content/uploads/PrTreinamentuFSSuKUFAtumasLiKISA_Tetum.pdf

¹²¹ Bele haree info kompleitu iha website JSMP: https://jsmp.tl/wp-content/uploads/PrtreinamentuSukuHatazAtabaeFSS_Tetum.pdf

kona-ba aplikasaun suspensaun ba pena prizaun sira ne'ebé dala barak halo komunidade sira konsidera lei la aplika ho di'ak¹²².

Partisipante husi Suku Kairui, Postu Administrativu Laleia, Munisípiu Manatutu, iha intervensaun partisipante sira nian hato'o preokupasaun kona-ba polémika públiku nian ne'ebé husu atu hatún Presidente Repúblika liuhusi dalan demostrasaun ne'e legál ka lae, entre lei formál ho kultura ida ne'ebé mak vale liu, sé mak tenke garantia direitu sidadaun sira-nian, kazu ne'ebé rezolve iha suku ho konsentimentu husi parte rua bele simu malu ne'e viola lei ka lae¹²³.


Partisipante husi Suku Uma Naruk, Postu Administrativu Laclo, Munisípiu Manatutu iha sira-nia intervensaun hatoo sira nian kestaun no preokupasaun sira ne'ebé partisipante sira koloka liga ho materia demokrázia mak kona-ba diferensia entre sistema prezidensiál no semi-prezidensiál, kestaun kona-ba sistema demokrázia ne'ebé viola no la respeita ema seluk nia direitu, planu governu atu harii edifísiu PN. Enkuantu iha sesaun kona-ba asesu ba justisa formál, partisipante sira husu kona-ba krime ne'ebé aman halo relasaun seksuál ho nia oan rasik (insestu), no kazu inan no aman sira baku labarik sira tanba la rona inan-aman, karik ida ne'e kontra lei¹²⁴.

Partisipante husi Suku Sagadate iha Postu Administrativu Laga, Munisípiu Baukau nia preokupasaun sira mak hanesan iha sesaun kona-ba demokrázia, kestaun prinsipál sira ne'ebé partisipante sira foti mak relasiona ho liberdade iha Estadu Direitu Demokrátiku no idade menus husi tinan 17 laiha direitu político atu tuir eleisaun maski demokrázia fó direitu no liberdade ba ema hotu-hotu.

Iha sesaun daruak kona-ba asesu ba justisa formál, partisipante sira preokupa ho seguransa ba sira nia-an bainhira sira hato'o keixa tanba sira sempre hetan ameasa husi suspeitu sira to'o baku malu no oho malu.

JSMP sukat koñesimentu partisipante sira nian liuhusi kestionáriu pré no pós teste hodi hatene tuir sira-nia koñesimentu antes hala'o treinamentu no depoisde hala'o treinamentu.

Gráfiku 5 Rezultadu pré no pós teste



¹²³Bele haree info kompleitu iha website JSMP: https://jsmp.tl/wp-content/uploads/PrTreinamentuKomunidadeSukuKAIRUIManatutu_TETUM.pdf

¹²⁴ Bele haree info kompleitu iha website JSMP: <https://jsmp.tl/wp-content/uploads/Membru-Konsellu-no-Komunidade-Suku-Uma-Naruk-preokupa-ho-kazu-insestu-2-Outubru-2020.pdf>

Iha gráfiku pós teste nian hatudu katak iha mudansa moderamente iha koñesimentu partisipante sira nian ba matéria ne'ebé JSMP hato'o iha treinamentu ne'e. Porsentajen la hatene nian tun husi 14% ba 3%, resposta sala husi 17% tun ba 11% no resposta loos sa'e husi 69% ba 86%.

Ida ne'e signifika katak liuhusi treinamentu ne'e, JSMP konsege hasa'e koñesimentu membru konsellu suku, membru komunidade no membru grupu ema ho defisiénsia husi 69% ba 86%.

VIII. Konklusaun no Rekomendasaun

Parlamentu Nasionál iha tinan 2020 hatudu produtividade no progresu serbisu signifikativu iha prodús lei importante sira, maski hasoru dezafíu barak ligadu ho establidade política entre bankada koaligasaun pre-eleitorál ne’ebé naksobu, bainhira sumba proposta OJE 2020 husi Governu da-VIII no impaktu seluk mak Estadu enfrenta kalamidade públiku tanba pandemia Covid-19.

Efeitu husi sumba orsamentu mak atividade órgaun soberania sira labele la’o ho normál tuir planu, inklui produtividade PN iha serbisu halo lei, fiskaliza no foti desizaun política.

Parlamentu Nasionál nia serbisu la dun ativu no efetivu iha parte identifika kestaun ka asuntu importante no pragmátku sira liga ho direitu no garantia fundamentál sira sidadaun nian ne’ebé konsagra iha Konstituisaun hodi kria lei espesífika sira atu asegura kumprimentu ba norma konstitusionál no pragmátku sira ne’e. Ida ne’e refleta iha número projetu lei ne’ebé PN inisia ki’ik liu kompara ho número proposta lei lei ne’ebé Governu aprezenta.

PN sei nafatin kontinua ho problema klásiku sira hanesan la dun iha kreatividade, pontualidade, koñesimentu limitadu ba língua Portugés, rekursu umanu no laiha Programa Lejislasaun Nasionál ba mandatu tinan lima nian ne’ebé kontinua mós fó impaktu maka’as ba produtividade PN nian.

Alende lei sira ne’ebé PN konsege aprova, sei iha lei importante barak mak PN la konsege diskute no aprova hanesan Lei Kria Orden Advogadu, Lei Protesaun Labarik, Esbosu Lei Podér lokál no Desentralizasaun Administrativa no Lei Eleitorál Munisipál, Lei Mineiru nsst.

Situasaun impase política entre órgaun soberanu sira, hamosu presedénsia oinoin no prática política ho caráter kontra-produtivu ka vingansa política ne’ebé fó impaktu ba interesse Estadu hodi hamosu situasaun risku ba funsionamentu Parlamentu no mós Governasaun. Situasaun sira ne’e, afeta ba estabilidade nasional no dezenvolvimentu nasional iha setór hotu.

Deputadu sira la asume sira-nia kna’ar ho di’ak nu’udar reprezentante povu bainhira ezerse sira-nia kompeténsia ka hala’o sira-nia knaar iha plenaria, maibé halo tuir de’it orientasaun política partidu nian duke haree ba interesse estadu nian. Intervensaun deputadu balun nian iha plenaria la uza liafuan ida ne’ebé di’ak no apropiadu ba públiku nu’udar órgaun ne’ebé povu reprezenta povu.

Komunidade sira iha área remota sira laiha asesu ba informasaun relativamente ba lei relevante sira ne’ebé vigora iha nasaun no falta informasaun kona-ba knaar sira kada órgaun soberanu nian no mekanizmu sira ne’ebé estadu establese hodi rezolve problema sira povu nian.

Nune’e, JSMP konklui relatório ida ne’e ho rekomenda balun ba PN atu:

- 1) Dezenvolve Programa Nasionál Lejislasaun ba iha kada Lejislatura atu bele tau iha prioriedade lei importante sira ne’ebé iha tinan barak pendente nomós kaduka iha Parlamentu Nasionál mak hanesan Lei Reparasaun no Institutu Memoria Públika atu bele asegura justisa tranzitória ba vítima krime pasadu nian; Lei Kriasau Oden Advogadu nian hodi reforsa sistema judisiáriu no asesu ba justisa, Lei Podér Lokál no Desentralizasaun Administrativa no Lei Eleisaun Munisipál hodi bele asegura implementasaun política

desentralizasaun administrativa, Lei Protesaun ba Labarik atu bele asegura no proteje ho di'ak direitu labarik sira nian, altera Kódigu Penál hodi kria artigu ketak ba inestu hodi bele proteje no promove valór morál Timor nian, altera Kódigu Sivíl atu inklui no rekoñese kazamentu husi konfisaun relijiozu sira seluk atu bele kumpri ho di'ak norma no prinsípiu sira K-RDTL no lei internasional sira ne'ebé Timor-Leste ratifika, liuliu kona-ba labele halo diskriminasaun tanba relijiaun.

- 2) Ativa no efetiva iha identifika asuntu ka kestaun importante no pragmátku sira ne'ebé konsagra iha Konstituisaun hodi kria lei espesíku no própria hodi bele asegura efetividade iha kumprimentu ba normál konstitusionál sira ne'e.
- 3) Deputadu sira atu halo tuir Rejimentu Parlamentu Nasional nian hodi tama sai serbisu pontuál no dixiplina nune'e bele hatudu imajen di'ak ba público nu'udar órgaun soberanu ne'ebé reprezenta povu no bele halo servisu ho di'ak atu bele aselara lei importante sira.
- 4) Parlamentu Nasional tenke aplika sansaun dixiplinár ba membru deputadu ne'ebé viola Rejimentu Parlamentu nian, nune'e bele prevene hahalok hanesan akontese iha futuru.
- 5) Evita no hamenus diskusaun no prática política ne'ebé orientadu ba interesse político partidáriu no kontra-produtivu ka vingansa política sira ne'ebé prejudika interesse nasional.
- 6) Parlamentu Nasional no instituisaun Estadu relevante sira atu envolve ativamente iha habesar informasaun kona-ba lei importante sira ne'ebé ligadu ba interesse komunidade sira-nian hanesan Lei Suku, Lei Titular ba Sasán Imóvel, Lei Espropriasaun, Lei Ordenamento Territorial no Lei Kontra Violénsia Doméstica, nune'e bele tulun líder lokál no komunidade sira bele hatene oinsa trata asuntu sira ne'e bainhira akontese iha sira-nia suku ka komunidade.
- 7) Hadi'a mekanizmu audénsia pública sira iha prosesu apresiasaun lezislasaun sira, liuliu tenke sumariza informasaun xave sira iha esbosu lei ne'ebé presiza rona hanoin sira husi ema barak, liuliu parte relevante no interesadu sira.
- 8) Meu sira apresiasaun público nian ba esbosu lei sira tenke nakloke ba público atu bele asesu liuhusi mídia sira hanesan internet no meu seluktan ne'ebé adekuadu ba público bele envolve.
- 9) Kria lei própria ba suspensaun ba mandatu ka levantamento imunidade deputadu sira-nian tuir provizaun Artigu 94 K-RDTL no Artigu 8 Lei Nú. 15/2009 ne'ebé altera ho Lei Nú. 1/2016 kona-ba Rejimentu PN. Lei próprio ida ne'e bele deskreve ho detallu kona-ba tipu krime sira ne'ebé bele priexe kritériu atu hasai imunidade no mós kona-ba nia prosedimento tantu político, administrativu no judisiál.
- 10) Deputadu sira tenke tane aas interesse nasional hodi evita interesse individuál no partidaria bainhira diskute no deside buat rumo relasiona ho interesse nasional.

- 11) Kria mekanizmu atu haree tuir ('*follow-up*') kona-ba saida mak Governu halo hodi hatan rekomendasaun husi relatóritu fiskalizasaun no asuntu sira ne'ebé deputadu sira hato'o ka kestiona iha plenaria.
- 12) Halo alterasaun provizaun Artigu 1475 Kódigu Sivíl hodi bele asegura direitu sidadaun sira hotu nian atu asesu ba serbisu públiku Estadu nian relativamente ba dokumentu kazamentu husi konfisaun religiozu sira seluk alende Katóliku;
- 13) Intensifika fiskalizasaun política ba aktu lezislativu sira ne'ebé Governu dekreta atu nune'e bele grantia nia konstitusionalidade.
- 14) Esbosu lei sira tenke fornese mós iha lian ofisiál Tetum atu bele fasilita deputadu sira no mós audiénsia sira bele entende ho di'ak.
- 15) Proposta OJE kada tinan tenke iha mós versaun Tetun no sumariza pontu importante sira iha OJE ho lian Tetun hodi públiku bele asesu no kumprende.
- 16) Sekretáriu Jerál Parlamentu Nasional atu bele halo planu no inklui orsamentu ba hadi'a facilidade ka espasu servisu ne'ebé di'ak no apropiadiu ba deputadu sira no funzionáriu sira atu asegura efetividade servisu Parlamentu Nasional nian.

Aneksu

Tabela aneksu iha karaik ne'e sei deskreve kona-bá esbosu proposta lei no proposta rezolusaun no mós projeto lei no rezolusaun sira ne'ebé admitidu iha Parlamentu Nasional no mós nia aprovisaun no promulgasaun sira iha tinan 2020.

Tabela 1 Lei promulgadu no publikadu iha Journál Repúblika

NÚMERU	DESKRISAUN	DATA PUBLIKSAUN
Nú.1/2020	Autorizasaun Deklarasaun Estadu Emerjénsia	27/03/2020
Nú.2/2020	Autorizasaun ba Realizasaun Transferênsia Extraordinária ida ba Fundo Petrolíferu	6/04/2020
Nú.3/2020	Autorizasaun Renovasaun ba Deklarasaun Estadu Emerjénsia	27/04/2020
Nú.4/2020	Autorizasaun Renovasaun ba Deklarasaun Estadu Emerjénsia	27/05/2020
Nú.5/2020	Autoriza ba realizasaun segunda Transferênsia Extraordinária ba Fundo Petrolíferu iha tinan finanseiru 2020 no prosede Alterasaun primeira ba Lei Nú.2/ 2020, de 6 de abril, sobre Autorizasaun ba Realizasaun Transferênsia Extraordinária ida ba Fundo Petrolíferu.	30/06/2020
Nú.6/2020	Konfirmasaun ba Deklarasaun Estadu Emerjénsia	12/08/2020
Nú.7/2020	Medida sira Prevensaun no Kombate Korrupsaun	26/08/2020
Nú.8/2020	Autorizasaun Renovasaun ba Deklarasaun Estadu Emerjénsia	3/09/2020
Nú.9/2020	Autorizasaun Renovasaun ba Deklarasaun Estadu Emerjénsia	3/10/2020

No. 10/2020	Orsamentu Jerál Estadu ba 2020	19/10/2020
Nú.11/2020	Autorizasaun Renovasaun ba Deklarasaun Estadu Emerjénsia	27/10/2020
Nú.12/2020	Lei ba Protesaun Sivíl	02/12/2020
Nú.13/2020	Autorizasaun Renovasaun ba Deklarasaun Estadu Emerjénsia	03/12/2020
Nú.14/2020	Orsamentu Jerál Estadu ba 2021	29/12/2020
Nú.15/2020	Autorizasaun Renovasaun ba Deklarasaun Estadu Emerjénsia	30/12/2020

Tabela 2 Rezolusaun sira ne'ebé aprovadu no publika ona iha Jornál Repúblika

NÚMERU	DESKRISAUN	DATA PUBLIKASAUN
N.o 1/2020	Rezolusaun Sobre Kombate ba Alterasaun Klimatíka	19/02/2020
N.o 2 /2020	Rezolusaun kona-ba Adosaun Medida sira para Prevensaun no Kombate Covid-19 no mós Medidas Recuperasaun no Normalizasaun Ekonómika-Sosiál iha País, no Akompañamentu ho Exékusaun Deklarasaun Estagdu Emerjénsia	8/04/2020
N.º 3/2020	Aprova Akordu Establesimetu Sede entre Repúblika Demokrática Timor-Leste ho g7+	22/04/2020
N.º 4 /2020	Ratifika Carta husi g7+	22/04/2020

N.o 5/2020	Aprova Konta Jerál Estadu ba 2018	12/06/2020
N.o 6/2020	Aprova Orsamentu Parlamentu Nasionál ba 2020	5/08/2020
N.o 7/2020	Designasaun husi Parlamentu Nasionál Membru ida ba Komisaun Funsaun Pública	5/08/2020
N.º 8 /2020	Autorizasaun Deklarasaun Estadu Emerjénsia	5/08/2020
N.o 9/2020	Aprova Orsamentu Parlamentu Nasionál ba 2021	30/09/2020
N.o 10/2020	Rekomenda ba Gouvernu Adosaun Medida sira ba Prevensaun Infantisídu no Abandono Bebé no Labarik	16/12/2020